

摘藻堂四庫全書薈要

經部

欽定四庫全書薈要

經部

周易本義卷

二至
四

詳校官祭酒臣章謙恒



欽定四庫全書薈要卷一百九十五

經部

周易本義卷二

宋 朱子 撰

周易下經



艮下
兌上

咸亨 利貞 取女吉

取七具反○咸交感也兌柔在上艮剛在下而交相感應又艮止則感之

專兌說則應之至又艮以少男下於兌之少女男先於女得男女之正婚姻之時故其卦為咸其占亨而利貞取女則吉蓋感有必通之理然不以貞則失其亨而所為皆凶矣○彖曰咸感也釋卦名義

柔上而剛下二氣感應以相與止而說男下女是以亨

利貞取女吉也

說音悅男下之下遐嫁反○以卦體卦德卦象釋卦辭或以卦變言柔上剛下

之義曰咸自旅來柔上居六剛下居五也亦通

天地感而萬物化生聖人感人

心而天下和平觀其所感而天地萬物之情可見矣

極言

之感通之理

○象曰山上有澤咸君子以虛受人

山上有澤以虛而通也

○初六咸其拇

拇茂后反○拇足大指也咸以人身取象感於最下咸拇之象也感之尚淺欲

進未能故不言吉凶此卦雖主於象曰咸其拇志在外

感然六爻皆宜靜而不宜動也

也○六二咸其腓凶居吉

腓房非反○腓足肚也欲行則先自動躁妄而不能固守

者也二當其處又以陰柔不能固守故取其象然有中正之德能居其所故其占動凶而靜吉也

象曰

雖凶居吉順不害也○九三咸其股執其隨往吝

足而隨

動不能自專者也執者主當持守之意下二爻皆欲動者三亦不能自守而隨之往則吝矣故其象占如此

象曰咸其股亦不處也志在隨人所執下也

言亦者因前二爻皆

欲動而云也二爻陰躁其動也宜九三陽剛居止之極宜靜而動可吝之甚也

○九四貞吉悔

亡憧憧往來朋從爾思

憧昌容反又音同○九四居股之上悔之下又當三陽之中心

之象咸之主也心之感物當正而固乃得其理今九四乃以陽居陰為失其正而不能固故因占設戒以為能正而固則吉而悔亡若憧憧往來不能正固而累於私感則但其朋類從之不復能及遠矣

象曰貞

吉悔亡未感害也憧憧往來未光大也

感害言不正而感則有害也

○九五咸其脢无悔

脢武杯反又音每○脢背肉在心

五適當其處故取其象而戒占者以能如是則雖不能感物而亦可以无悔也

象曰咸其脢志

末也

志末謂不能感物

○上六咸其輔頰舌

頰舌皆所以言者而

在身之上上六以陰居說之終處咸之極感人以象曰言而无其實又兌為口舌故其象如此凶咎可知

咸其輔頰舌滕口說也

滕騰通用



巽下震上

恒亨无咎利貞利有攸往

恒常久也為卦震剛在上巽柔在下震雷巽風二物相與

異順震動為巽而動二體六爻陰陽相應四者皆理之常故為恒其占為能久於其道則亨而无咎然又必利

於守貞則乃為得所常
久之道而利有所往也

○彖曰恒久也剛上而柔下雷

風相與巽而動剛柔皆應恒

以卦體卦象卦德釋卦名義或以卦變言剛上柔下

之義曰恒自豐來剛上
居二柔下居初也亦通

恒亨无咎利貞久於其道也天

地之道恒久而不已也

恒固能亨且无咎矣然必利於正乃為久於其道不正則久非

其道矣天地之道所以
長久亦以正而已矣

利有攸往終則有始也

久於其道終也

利有攸往始也動靜相生
循環之理然必靜為主也

日月得天而能久照四時變

化而能久成聖人久於其道而天下化成觀其所恒而

天地萬物之情可見矣

極言恒久之道

○象曰雷風恒君子以

立不易方○初六浚恒貞凶无攸利

初與四為正應理之常也然初居下

而在初未可以深有所求四震體而陽性上而不下又

為二三所隔應初之意異乎常矣初之柔暗不能度勢

又以陰居巽下為巽之主其性務入故深以常理求

之浚恒之象也占者如此則雖貞亦凶而无所利矣象

曰浚恒之凶始求深也○九二悔亡

以陽居陰本當有悔以其久中故得

亡也象曰九二悔亡能久中也○九三不恒其德或承之

羞貞吝

位雖得正然過剛不中志從於上不能久於其所故為不恒其德或承之羞之象或者不知其

何人之辭承奉也言人皆得奉而進之不知其所自來也貞吝者正而不恒為可羞吝申戒占者之辭象

曰不恒其德无所容也○九四田无禽

以陽居陰久非其位故為此象

占者田無所獲而凡事亦不得其所求也象曰久非其位安得禽也○六五

恒其德貞婦人吉夫子凶

以柔中而應剛中常久不易正而固矣然乃婦人之道非

夫子之宜也故其象占如此

象曰婦人貞吉從一而終也夫子制義

從婦凶也○上六振恒凶

振者動之速也上六居恒之極處震之終恒極則不常震

終則過動又陰柔不能固守居上非其所安故有振恒之象而其占則凶也

象曰振恒在上

大无功也



艮下乾上

遯亨小利貞

遯徒困反○遯退避也為卦二陰浸長陽當退避故為遯六月之卦也陽雖當遯然

九五當位而下有六二之應若猶可以有為但二陰浸長於下則其勢不可以不遯故其占為君子能遯則身雖退而道亨小人則利於守正不可以浸長之故而遂侵迫於陽也小謂陰柔小人也此卦之占與否之初二兩爻相類 ○彖曰遯亨遯而亨也剛當位而應與時行也

九以

五一爻釋亨義

小利貞浸而長也

長丁丈反○以下二陰釋小利貞

遯之時義

大矣哉

陰方浸長處之為難故其時義為尤大也

○象曰天下有山遯君子

以遠小人而不惡而嚴

遠袁萬反○天體无窮山高有限遯之象也嚴者君子自守之常而

小人自

不能近

○初六遯尾厲勿用有攸往

遯而在後尾之象危之道也占者不

可以有所往但晦處靜俟可免災耳

象曰遯尾之厲不往何災也○六二

執之用黃牛之革莫之勝說

勝音升說吐活反○以中順自守人莫能解必遯之

志也占者固守亦當如是

象曰執用黃牛固志也○九三係遯有疾

厲畜臣妾吉

畜許六反○下比二陰當遯而有所係之象有疾而危之道也然以畜臣妾則吉蓋

君子之於小人惟臣妾則不必其賢而可畜耳故其占如此

象曰係遯之厲有疾憊

也畜臣妾吉不可大事也

憊音敗

○九四好遯君子吉小

人否

好呼報反否方有反○下應初六而乾體剛健有所好而能絕之以遯之象也唯自克之君子能之

而小人不能故占者君子則吉而小人否也

象曰君子好遯小人否也○九

五嘉遯貞吉

剛陽中正下應六二亦柔順而中正遯之嘉美者也占者如是而正則吉矣

象

曰嘉遯貞吉以正志也○上九肥遯无不利

以剛陽居卦外下无

係應遯之遠而處之裕者也故其象占如此肥者寬裕自得之意

象曰肥遯无不利无

所疑也



乾下
震上

大壯利貞

大謂陽也四陽盛長故為大壯二月之卦也陽壯則占者吉亨不假言但利在正固而已

○彖曰大壯大者壯也剛以動故壯

釋卦名義以卦體言則陽長過中大

者壯也以卦德言則乾剛震動所以壯也

大壯利貞大者正也正大而天地

之情可見矣

釋利貞之義而極言之

○象曰雷在天上大壯君子

以非禮弗履

自勝者強

○初九壯于趾征凶有孚

趾在下而進動之物

也剛陽處下而當壯時壯于進者也故有此象居下而壯於進其凶必矣故其占又如此

象曰壯于

趾其孚窮也

言必困窮

○九二貞吉

以陽居陰已不得其正矣然所處得中則猶可

因以不失其正故戒占者使因中以求正然後可以得吉也

象曰九二貞吉以中也

○九三小人用壯君子用罔貞厲羝羊觸藩羸其角

羝音

低羸力追反○過剛不中當壯之時是小人用壯而君子則用罔也罔无也視有如无君子之過於勇者也如此則雖正亦危矣羝羊剛壯喜觸之物

象曰小人用壯

君子罔也

小人以壯敗君子以罔困

○九四貞吉悔亡藩決不羸壯

于大輿之輓

輓音福○貞吉悔亡與咸九四同占藩決不羸承上文而言也決開也三前有四猶

有藩焉四前二陰則藩決矣壯于大輿之輓亦可進之象也以陽居陰不極其剛故其象如此象曰藩

決不羸尚往也

通尚上

○六五喪羊于易无悔

喪息浪反象同易以

鼓反一音亦旅卦同○卦體似兌有羊象焉外柔而內剛者也獨六五以柔居中不能抵觸雖失其壯然亦无所悔矣故其象如此而占亦與咸九五同易容易之易言忽然不覺其亡也或作疆場之場亦通漢食貨志場

作易象曰喪羊于易位不當也○上六羝羊觸藩不能退

不能遂无攸利艱則吉

壯終動極故觸藩而不能退然其質本柔故又不能遂其進也

其象如此其占可知然猶幸其不剛故能艱以處則尚可以得吉也象曰不能退不能遂

不詳也艱則吉咎不長也



離上坤下

晉康侯用錫馬蕃庶晝日三接

晉進也康侯安國之侯也錫馬蕃庶晝日三接

言多受大賜而顯被親禮也蓋其為卦上離下坤有日出地上之象順而麗乎大明之德又其變自觀而來為六四之柔進而上行以至於五占者有是三者則亦當有是寵也

○彖曰晉進也

釋卦名義

明出地上順而麗乎大明柔進而上行是以康侯用錫

馬蕃庶晝日三接也

上行之上時掌反○以卦象卦德卦變釋卦辭

○象曰明

出地上晉君子以自昭明德

昭明也

○初六晉如摧如貞

吉罔孚裕无咎

以陰居下應不中正有欲進見摧之象占者如是而能守正則吉設不為人所

信亦當處以寬裕則无咎也

象曰晉如摧如獨行正也裕无咎未受

命也

初居下位未

○六二晉如愁如貞吉受茲介福于

其王母

六二中正上无應援故欲進而愁占者如是而能守正則吉而受福于王母也王母指六五蓋

享先妣之吉占而凡以陰居尊者皆其類也

象曰受茲介福以中正也○六

三衆允悔亡

三不中正宜有悔者以其與下二陰皆欲上進是以為衆所信而悔亡也

象曰

衆允之志上行也○九四晉如鼫鼠貞厲

鼫音石○不中不正以竊

高位貪而畏人蓋危道也故為鼫鼠之象占者如是雖正亦危

象曰鼫鼠貞厲位不當

也○六五悔亡失得勿恤往吉无不利

以陰居陽宜有悔矣以大明在

上而下皆順從故占者得之則其悔亡又一切去其計功謀利之心則往吉而无不利也然亦必有其德乃應

其占耳

象曰失得勿恤往有慶也○上九晉其角維用伐

邑厲吉无咎貞吝

角剛而居上上九剛進之極有其象矣占者得之而以伐其私邑則雖危

而吉且无咎然以極剛治小邑雖得其正亦可吝矣

象曰維用伐邑道未光也



離下坤上

明夷利艱貞

夷傷也為卦下離上坤日入地中明而見傷之象故為明夷又其上六為暗之主六

五近之故占者利於艱難以守正而自晦其明也

○象曰明入地中明夷

以卦象釋

卦名 內文明而外柔順以蒙大難文王以之

○難去聲下同
以卦德釋

卦義蒙大難謂遭
紂之亂而見囚也

利艱貞晦其明也內難而能正其志

箕子以之

以六五一爻之義釋卦辭內難謂為紂
近親在其國內如六五之近於上六也

○象

曰明入地中明夷君子以莅衆用晦而明○初九明夷

于飛垂其翼君子于行三日不食有攸往主人有言

飛而

垂翼見傷之象占者行而不食所
如不合時義當然不得而避也

象曰君子于行義不

食也

唯義所在
不食可也

○六二明夷夷于左股用拯馬壯吉

拯

陵反渙初爻同○傷而未切救
之速則免矣故其象占如此

象曰六二之吉順以則

也○九三明夷于南狩得其大首不可疾貞

以剛居剛又在明體

之上而屈於至暗之下正與上六闇主為應故有向明除害得其首惡之象然不可以亟也故有不可疾貞之戒成湯起於夏臺文王興於羑里象曰南狩之志乃大

得也○六四入于左腹獲明夷之心于出門庭

此爻之義未詳

竊疑左腹者幽隱之處獲明夷之心于出門庭者得意於遠去之義言筮而得此者其自處當如是也蓋離體為至明之德坤體為至闇之地下三爻明在闇外故隨其遠近高下而處之不同六四以柔正居闇地而尚淺故猶可以得意於遠去五以柔中居闇地而已迫故為內難正志以晦其明之象上則極乎闇矣故為自傷其明以至於闇而又足以傷人之明蓋下象曰入于左腹五爻皆為君子獨上一爻為闇君也

獲心意也

音臆 意叶

○六五箕子之明夷利貞

居至闇之地 近至闇之君

而能正其志箕子之象也 貞之至也利貞以戒占者

象曰箕子之貞明不可息也

○上六不明晦初登于天後入于地

以陰居坤之極不 明其德以至於晦

始則處高位以傷人之明終必至於自傷 而墜厥命故其象如此而占亦在其中矣

象曰初登于

天照四國也後入于地失則也

照四國 以位言



離下 巽上

家人利女貞

家人者一家之人卦之九五六二外內各 得其正故為家人利女貞者欲先正乎內

也內正則外 无不正矣

○彖曰家人女正位乎內男正位乎外男

女正天地之大義也

以卦體九五六二釋利女貞之義

家人有嚴君焉

父母之謂也

亦謂二五

父父子子兄兄弟弟夫夫婦婦而家

道正正家而天下定矣

上父初子五三夫四二婦五兄三弟以卦畫推之又有此象

○象曰風自火出家人君子以言有物而行有恒

行下孟反

○身修則家治矣

○初九閑有家悔亡

初九以剛陽處有家之始能防閑之其悔亡矣

戒占者當如是也

象曰閑有家志未變也

志未變而豫防之

○六二无

攸遂在中饋貞吉

六二柔順中正女之正位乎內者也故其象占如此

象曰六二

之吉順以巽也○九三家人嗃嗃悔厲吉婦子嘻嘻終

吝

嗃呼落反。喜悲反。象同。○以剛居剛而不中過乎剛者也。故有嗃嗃嚴厲之象。如是則雖有悔厲而吉。

也。嗃嗃者嗃嗃之反。吝之道也。象曰：家人嗃嗃，未失也。占者各以其德為應，故兩言之。

婦子嘻嘻，失家節也。○六四：富家大吉。

陽主義陰主利，以陰居陰而在。

上位能富其家者也。

象曰：富家大吉，順在位也。○九五：王假有家。

勿恤，吉。

假，更白反。○假至也。如假于太廟之假，有家猶言有國也。九五剛健中正，下應六二之柔順中。

正王者，以是至于其家，則勿用憂恤而吉可必矣。蓋聘納后妃之吉占，而凡有是德者遇之皆吉也。

象曰：

王假有家，交相愛也。

程子曰：夫愛其內，助婦愛其刑家。

○上九：有孚，威。

如終吉。

上九以剛居上在卦之終，故言正家久遠之道，占者必有誠信，嚴威則終吉也。

象曰：威。

如之吉反身之謂也

謂非作威也反身自治則人畏服之矣



兌下離上

睽小事吉

睽苦圭反○睽乖異也為卦上火下澤性相違異中女少女志不同歸故為睽然以卦德

言之內說而外明以卦變言之則自離來者柔進居三自中孚來者柔進居五自家人來者兼之以卦體言之則六五得中而下應九二之剛是以其占不可大事而小事尚有吉之道也

○彖曰睽火動

而上澤動而下二女同居其志不同行

上下俱上聲下同○以卦象釋

卦名義

說而麗乎明柔進而上行得中而應乎剛是以小

事吉

說音悅○以卦德卦變卦體釋卦辭

天地睽而其事同也男女睽而

其志通也萬物睽而其事類也睽之時用大矣哉

極言其理

而贊之

○象曰上火下澤睽君子以同而異

二卦合體而性不同

○

初九悔亡喪馬勿逐自復見惡人无咎

喪去聲○上无正應有悔也而

居睽之時同德相應其悔亡矣故有喪馬勿逐而自復之象然亦必見惡人然後可以辟咎如孔子之於陽貨

也

象曰見惡人以辟咎也

辟音避

○九二遇主于巷无咎

二五陰陽正應居睽之時乖戾不合必委曲相求而得會遇乃為无咎故其象占如此

象曰遇主

于巷未失道也

本其正應非有邪也

○六三見輿曳其牛掣其人

天且劓无初有終

曳以制反掣昌逝反劓魚器反○六三上九正應而三居二陽之間後為

二所曳前為四所掣而當睽之時上九猜狠方深故又有髡劓之傷然邪不勝正終必得合故其象占如此

象曰見輿曳位不當也无初有終遇剛也○九四睽孤

遇元夫交孚厲无咎

夫如字○睽孤謂无應遇元夫謂得初九交孚謂同德相信然當睽

時故必危厲乃得无咎占者亦如是也

象曰交孚无咎志行也○六五悔

亡厥宗噬膚往何咎

噬市制反○以陰居陽悔也居中得應故能亡之厥宗指九二噬膚

言易合六五有柔中之德故其象占如是

象曰厥宗噬膚往有慶也○上九

睽孤見豕負塗載鬼一車先張之弧後說之弧匪寇婚

媾往遇雨則吉

孤音胡說吐活反媾古豆反○睽孤謂六三為二陽所制而已以剛處明極睽

極之地又自猜狠而乖離也見豕負塗見其汚也載鬼一車以无為有也張弧欲射之也說弧疑稍釋也匪寇婚媾知其匪寇而實親也往遇雨則吉疑盡釋而睽合也上九之與六三先睽後合故其象占如此象曰遇雨之吉羣疑亡也



艮下
坎上

蹇利西南不利東北利見大人貞吉

蹇紀免反○蹇難也足不能進行之

難也為卦艮下坎上見險而止故為蹇西南平易東北險阻又艮方也方在蹇中不宜走險又卦自小過而來陽進則往居五而得中退則入於艮而不進故其占曰利西南不利東北當蹇之時必見大人然後可以濟難又必守正然後得吉而卦之九五剛健中正有大人之象自二以上五爻皆得正位則又貞之義也故其占又

曰利見大人貞吉蓋見險者貴於能止而又不
可終於止處險者利於進而不可失其正也 ○象曰

蹇難也險在前也見險而能止知矣哉

難乃旦反知音
智○以卦德釋

卦名義而
贊其美

蹇利西南往得中也不利東北其道窮也利

見大人往有功也當位貞吉以正邦也蹇之時用大矣

哉

以卦變卦體釋卦辭
而贊其時用之大也

○象曰山上有水蹇君子以反

身脩德○初六往蹇來譽

往遇險
來得譽

象曰往蹇來譽宜待

也○六二王臣蹇蹇匪躬之故

柔順中正正應在上而
在險中故蹇而又蹇以

求濟之非以其身之故也不言吉凶者占者但
當鞠躬盡力而已至於成敗利鈍則非所論也

象曰王

臣蹇蹇終无尤也

事雖不濟亦无可尤

○九三往蹇來反

反就二陰得其

所安

象曰往蹇來反內喜之也

○六四往蹇來連

連於九三合力

以濟

象曰往蹇來連當位實也

當去聲

○九五大蹇朋來

大蹇

者非常之蹇也九五居尊而有剛健中正之德必有朋來而助之者占者有是德則有是助矣

象曰大

蹇朋來以中節也○上六往蹇來碩吉利見大人

已在卦極

往無所之益以蹇耳來就九五與之濟蹇則有碩大之功大人指九五曉占者宜如是也

象曰往蹇

來碩志在內也利見大人以從貴也



坎下
震上

解利西南无所往其來復吉有攸往夙吉

解音懈象傳
大象同○解

難之散也居險能動則出於險之外矣解之象也難之既解利於平易安靜不欲久為煩擾且其卦自升來三往居四入於坤體二居其所而又得中故利於西南平易之地若无所往則宜來復其所而安靜若尚有所往則宜早往早復不可久煩擾也

○彖曰解險以動動而免乎險解

以卦德釋

卦名義

解利西南往得衆也其來復吉乃得中也

夙吉往有功也

以卦變釋卦辭坤為衆得衆謂九四入坤體得中有功皆指九二

天地

解而雷雨作雷雨作而百果草木皆甲坼解之時大矣

哉

極言而贊其大也

○象曰雷雨作解君子以赦過宥罪○初

六无咎

難既解矣以柔在下上有正應何咎之有故其占如此

象曰剛柔之際義

无咎也○九二田獲三狐得黃矢貞吉

此又取象之意未詳或曰卦凡四陰除六五君位餘三陰即三狐之象也大抵此爻為卜田之吉占亦為去邪媚而得中直之象能守其正則无不吉矣

象曰九二貞吉得中道也○六三負且乘致寇至

貞吝

乘如字又石證反○繫辭備矣貞吝言雖以正得之亦可羞也唯避而去之為可免耳

象曰

負且乘亦可醜也自我致戎又誰咎也

戎古本作寇

○九四

解而拇朋至斯孚

解佳買反象同拇茂后反○拇指初初與四皆不得其位而相應應之不以正者也然四陽初陰其類不同若能解而去之則君子之朋至而相信也

象曰解而拇未

當位也○六五君子維有解吉有孚于小人

解音懈象同○卦凡

四陰而六五當君位與三陰同類者必解而去之則吉也孚驗也君子有解以小人退為驗也

象曰

君子有解小人退也○上六公用射隼于高墉之上獲

之无不利

射食亦反隼荀尹反○繫辭備矣

象曰公用射隼以解悖也

解佳買反



兌下艮上

損有孚元吉无咎可貞利有攸往

損減省也為卦損下卦上畫之陽益上卦

上畫之陰損兌澤之深益艮山之高損下益上損內益外剝民奉君之象所以為損也損所當損而有孚信則

其占當有此下
四者之應矣

易之用二簋可用享

簋音軌○言當損時則至薄无害

○彖曰損損下益上其道上行

以上行之上時掌反○以卦體釋卦名義

損

而有孚元吉无咎可貞利有攸往易之用二簋可用享

二簋應有時損剛益柔有時損益盈虛與時偕行

此釋卦辭

時謂當損之時

○象曰山下有澤損君子以懲忿窒欲

懲直升反○君

子脩身所當損者莫切於此

○初九已事遄往无咎酌損之

已音以遄市專

反四爻同○初九當損下益上之時上應六四之陰輟所為之事而速往以益之无咎之道也故其象占如此

然居下而益上亦當斟酌其淺深也

象曰已事遄往尚合志也

尚上通

○九

二利貞征凶弗損益之

九二剛中志在自守不肯妄進故占者利貞而征則凶也弗損

益之言不變其所守乃所以益上也

象曰九二利貞中以為志也○六三

三人行則損一人一人行則得其友

下卦本乾而損上爻以益坤三人行

而損一人也一陽上而一陰下一人行而得其友也兩相與則專三則雜而亂卦有此象故戒占者當致一也

象曰一人行三則疑也○六四損其疾使遄有喜无咎

以初九之陽剛益已而損其陰柔之疾唯速則善戒占者如是則无咎矣

象曰損其疾亦可

喜也○六五或益之十朋之龜弗克違元吉

柔順虛中以居尊位

當損之時受天下之益者也兩龜為朋十朋之龜大寶也或以此益之而不能辭其吉可知占者有是德則獲

其應也

象曰六五元吉自上祐也○上九弗損益之无咎

貞吉利有攸往得臣无家

上九當損下益上之時居卦之上受益之極而欲自損以

益人也然居上而益下有所謂惠而不費者不待損已然後可以益人也能如是則无咎然亦必以正則吉而利有所往惠而不費其惠廣矣故又曰得臣无家

象曰弗損益之大得志也



震下巽上

益利有攸往利涉大川

益增益也為卦損上卦初畫之陽益下卦初畫之陰自上卦而下

下於下卦之下故為益卦之九五六二皆得中正下震上巽皆木之象故其占利有所往而利涉大川也○

彖曰益損上益下民說无疆自上下下其道大光

上下下

去聲○以卦利有攸往中正有慶利涉大川木道乃行

體釋卦名義

以卦體卦

益動而巽日進无疆天施地生其益无方凡

象釋卦辭

益之道與時偕行

施始豉反○動巽二卦之德乾下施坤上生亦上文卦體之義又以此極

言贊益

○象曰風雷益君子以見善則遷有過則改

風雷

之大

之勢交相助益遷善改過益

之大者而其相益亦猶是也

○初九利用為大作元吉

无咎

初雖居下然當益下之時受上之益者也不可徒然无所報效故利用為大作必元吉然後得无咎

象曰元吉无咎下不厚事也

下本不當任厚事故不如是不足以塞咎也

○

六二或益之十朋之龜弗克違永貞吉王用亨于帝吉

六二當益下之時虛中處下故其象占與損六五同然爻位皆陰故以永貞為戒以其居下而受上之益故又為卜郊象曰或益之自外來也或者衆无定主之辭○六三益之

用凶事无咎有孚中行告公用圭

六三陰柔不中不正不當得益者也然當

益下之時居下之上故有益之以凶事者蓋警戒震動乃所以益之也占者如此然後可以无咎又戒以有孚中行而告公用圭象曰益用凶事固有之也益用凶事也

衡慮而固

○六四中行告公從利用為依遷國

三四皆不得中

故皆以中行為戒此言以益下為心而合於中行則告公而見從矣傳曰周之東遷晉鄭焉依蓋古者遷國以益下必有所依然後能立象曰告公從以益志也○九此爻又為遷國之吉占也

五有孚惠心勿問元吉有孚惠我德

上有信以惠於下則下亦有信以惠

於上矣不問而元吉可知

象曰有孚惠心勿問之矣惠我德大得志

也○上九莫益之或擊之立心勿恒凶

以陽居益之極求益不已故莫

益而或擊之立心勿恒戒之也

象曰莫益之偏辭也或擊之自外來也

莫益之者猶從其求益之偏辭而言也若究而言之則又有擊之者矣



乾下兌上

夬揚于王庭孚號有厲告自邑不利即戎利有攸往

夬古

快反號戶羔反卦內並同○夬決也陽決陰也三月之卦也以五陽去一陰決之而已然其決之也必正名其

罪而盡誠以呼號其衆相與合力然亦尚有危厲不可
安肆又當先治其私而不可專尚威武則利有所往也
皆戒之
○彖曰夬決也剛決柔也健而說決而和說音悅○

釋卦名義
而贊其德
揚于王庭柔乘五剛也孚號有厲其危乃光

也告自邑不利即戎所尚乃窮也利有攸往剛長乃終

也
長丁丈反○此釋卦辭柔乘五剛以卦體言謂以一
小人加於衆君子之上是其罪也剛長乃終謂一變

則為純
乾也
○象曰澤上於天夬君子以施祿及下居德則

忌
上時掌反施始鼓反○澤上於天潰決之勢
也施祿及下潰決之意也居德則忌未詳
○初九

壯于前趾往不勝為咎
前猶進也當決之時居下任
壯不勝宜矣故其象占如此象

曰不勝而往咎也○九二惕號莫夜有戎勿恤

○莫音暮
九二

當決之時剛而居柔又得中道故能憂惕
號呼以自戒備而莫夜有戎亦可无患也

象曰有戎勿

恤得中道也○九三壯于頄有凶君子夬夬獨行遇雨

若濡有愠无咎

頄求龜反○頄顧也九三當決之時以剛而過乎中是欲決小人而剛壯見于

面目也如是則有凶道矣然在衆陽之中獨與上六為應若能果決其決不係私愛則雖合於上六如獨行遇雨至於若濡而為君子所愠然終必能決去小人而无所咎也溫嶠之於王敦其事類此

象曰君子

夬夬終无咎也○九四臀无膚其行次且牽羊悔亡聞

言不信

臀徒敦反次七私反且七余反姤卦同○以陽居陰不中不正居則不安行則不進若不與衆

陽競進而安出其後則可以亡其悔然當決之時志在上進必不能也占者聞言而信則轉凶而吉矣牽羊者當其前則不進縱之使前而隨其後則可以行矣

象曰其行次且位不當也聞

言不信聰不明也○九五覓陸夬夬中行无咎

覓開辨反○覓

陸今馬齒覓感陰氣之多者九五當決之時爲決之主而切近上六之陰如覓陸然若決而決之而又不爲過暴合於中行則无咎

象曰中行无咎中未光也

程傳備矣傳曰

卦辭言夬夬則於中行爲无咎矣象復盡其義云中未光也夫人心正意誠乃能極中正之道而充實光輝五心有所比以義之不可而決之雖行於外不失中正之義可以无咎然於中道未得爲光大也蓋人心一有所欲則離道矣夫子於此示人之意深矣

○上六无號終有凶

陰柔小人居窮極之時黨

類已盡无所號呼終必有凶也占者有君子之德則其敵當之不然反是象曰无號之凶終

不可長也



巽下乾上

姤女壯勿用取女

姤古后反取七喻反○姤遇也決盡則為純乾四月之卦至姤然後一陰

可見而為五月之卦以其本非所望而卒然值之如不期而遇者故為遇遇已非正又一陰而遇五陽則女德不貞而壯之甚也取以自配必害乎陽故其象占如此○彖曰姤遇也柔遇剛也

釋卦名

勿用取女不可與長也

釋卦辭

天地相遇品物咸章

也體言剛遇中正天下大行也

指九五

姤之時義大矣哉

幾微之際
聖人所謹

○象曰天下有風姤后以施命誥四方○初

六繫于金柅貞吉有攸往見凶羸豕孚蹢躅

柅乃李反又女紀反

○柅所以止車以金為之其剛可知一陰始生靜正則吉往進則凶故以二義戒小人使不害於君子則有吉而无凶然其勢不可止也故以羸豕蹢躅曉君子使深為之備云
象曰繫于金柅柔道

牽也

牽進也以其進故止之

○九二包有魚无咎不利賓

魚陰物二與初

遇為包有魚之象然制之在已故猶可以无咎若不制而使遇於眾則其為害廣矣故其象占如此

象曰

包有魚義不及賓也○九三臀无膚其行次且厲无大

咎

九三過剛不中下不過于初上无應於上居則不安行則不進故其象占如此然既无所遇则无陰邪之

傷故雖危厲而无大咎也

象曰其行次且行未牽也○九四包无魚

起凶

初六正應已過於二而不及於已故其象占如此

象曰无魚之凶遠民也

遠袁萬反○民之去已猶已遠之

○九五以杞包瓜含章有隕自天

陰瓜

物之在下者甘美而善潰杞高大堅實之木也五以陽剛中正主卦於上而下防始生必潰之陰其象如此然陰陽迭勝時運之常若能含晦章美靜以制之則可以回造化矣有隕自天本无而條有之象也象曰

九五含章中正也有隕自天志不舍命也

舍音捨

○上九

姤其角吝无咎

角剛乎上者也上九以剛居上而无位不得其遇故其象占與九三類

象

曰姤其角上窮吝也

䷁ 坤下
兌上

萃亨王假有廟利見大人亨利貞用大牲吉利有攸往

假更白反○萃聚也坤順兌說九五剛中而二應之又為澤上於地萬物萃聚之象故為萃亨字衍文王假有廟言王者可以至于宗廟之中王者卜祭之吉占也祭義曰公假于太廟是也廟所以聚祖考之精神又人必能聚己之精神則可以至于廟而承祖考也物既聚則必見大人而後可以得亨然又必利於正所聚不正則亦不能亨也大牲必聚而後有聚則○象曰萃聚也順可以有攸往皆占吉而有戒之辭

以說剛中而應故聚也

說音悅○以卦德卦體釋卦名義

王假有廟致

孝享也利見大人亨聚以正也用大牲吉利有攸往順

天命也

釋卦辭

觀其所聚而天地萬物之情可見矣

極言其理

而贊之

○象曰澤上於地萃君子以除戎器戒不虞

上時掌反

○除者修而聚之之謂

○初六有孚不終乃亂乃萃若號一握為

笑勿恤往无咎

號平聲○初六上應九四而隔於二陰當萃之時不能自守是有孚而不終志

亂而妄聚也若呼號正應則衆以為笑但勿恤而往從正應則无咎矣戒占者當如是也象曰乃亂

乃萃其志亂也○六二引吉无咎孚乃利用禴

禴羊畧反○二

應五而雜於二陰之間必牽引以萃乃吉而无咎又二中正柔順虛中以上應九五剛健中正誠實而下交故卜祭者有其孚誠則雖薄物亦可以祭矣象曰引吉无咎中未變也○六三

萃如嗟如无攸利往无咎小吝

六三陰柔不中不正上无應與欲求萃於近而

不得故嗟如而无所利唯往從於上可以无咎然不得其萃困然後往復得陰極无位之爻亦可小羞矣戒占者當近捨不正之強援而遠

象曰往无咎上巽也○九

四大吉无咎

上比九五下比衆陰得其萃矣然以陽居陰不正故戒占者必大吉然後得无咎也

象曰大吉无咎位不當也○九五萃有位无咎匪孚元

永貞悔亡

九五剛陽中正當萃之時而居尊固无咎矣若有未信則亦脩其元永貞之德而悔亡矣

戒占者當如是也

象曰萃有位志未光也

未光謂匪孚

○上六齋咨

涕洟无咎

齋音咨又將啼反洟音夷象同○處萃之終陰柔无位求萃不得故戒占者必如是而後

可以无咎也

象曰齎咨涕洟未安上也



巽下坤上

升元亨用見大人勿恤南征吉

升進而上也卦自解來柔上居四內巽外順九

二剛中而五應之是以其占如此南征前進也

○彖曰柔以時升

以卦變釋卦名

巽而

順剛中而應是以大亨

以卦德卦體釋卦辭

用見大人勿恤有慶

也南征吉志行也○象曰地中生木升君子以順德積

小以高大

王肅本順作慎今按他書引此亦多作慎意尤明白蓋古字通用也說見上篇蒙卦

○

初六允升大吉

初以柔順居下巽之主也當升之時巽於二陽占者如之則信能升而大吉矣

象曰允升大吉上合志也○九二孚乃利用禴无咎

義見

萃卦

象曰九二之孚有喜也○九三升虛邑

陽實陰虛而坤有國邑之

象九三以陽剛當升時而進臨於坤故其象占如此

象曰升虛邑无所疑也○六

四王用亨于岐山吉无咎

義見隨卦

象曰王用亨于岐山順

事也

以順而升登祭于山之象

○六五貞吉升階

以陰居陽當升而居尊位必能正固

則可以得吉而升階矣階升之易者

象曰貞吉升階大得志也○上六冥

升利于不息之貞

以陰居升極昏冥不已者也占者遇此无適而利但可反其不已於外之

心施之於不息之正而已

象曰冥升在上消不富也



坎下
兌上

困亨貞大人吉无咎有言不信

困者窮而不能自振之義坎剛為兌柔所揜九

二為二陰所揜四五為上六所揜所以為困坎險兌說處險而說是身雖困而道則亨也二五剛中又有大人

之象占者處困能亨則得其正矣非大人其孰能之故曰貞又曰大人者明不正之小人不能當也有言不信

又戒以當務晦默不可尚口益取困窮

○彖曰困剛揜也

以卦體險以說釋卦名

困而不失其所亨其唯君子乎貞大人吉以剛中也有

言不信尚口乃窮也

說音悅○以卦德卦體釋卦辭

○象曰澤无水困

君子以致命遂志

水下漏則澤上枯故曰澤无水致命猶言授命言持以與人而不之有也

能如是則雖困而亨矣

○初六臀困于株木入于幽谷三歲不覿

臀物之底也困于株木傷而不能安也初六以陰柔處困之底居暗之甚故其象占如此

象曰入于

幽谷幽不明也○九二困于酒食朱紱方來利用亨祀

征凶无咎

紱音弗亨讀作享○困于酒食厭飫苦惱之意酒食人之所欲然醉飽過宜則是反為所

困矣朱紱方來上應之也九二有剛中之德以處困時雖无凶害而反困於得其所欲之多故其象如此而其占利以亨祀若征行則非其時故凶而於義為无咎也

象曰困于酒食中有慶也

○六三困于石據于蒺藜入于其宮不見其妻凶

陰柔而不

中正故有此象而其占則凶石指四蒺藜指二宮謂三而妻則六也其義則繫辭備矣

象曰據于

蒺藜乘剛也入于其宮不見其妻不祥也○九四來徐

徐困于金車吝有終

初六九四之正應九四處位不當不能濟物而初六方困於下又為

九二所隔故其象如此然邪不勝正故其占雖為可吝而必有終也金車為九二象未詳疑坎有輪象也象

曰來徐徐志在下也雖不當位有與也○九五劓刖困

于赤紱乃徐有說利用祭祀

劓音見睽刖音月說音悅○劓刖者傷於上下上下

既傷則赤紱无所用而反為困矣九五當困之時上為陰揜下則乘剛故有此象然剛中而說體故能遲久而有說也占具象中又象曰劓刖志未得也乃徐有說以利用祭祀久當獲福

中直也利用祭祀受福也○上六困于葛藟于臲臲曰

動悔有悔征吉

藹力軌反艱五結反碗五骨反○以陰柔處困極故有困于葛藹于艱碗曰動

悔之象然物窮則變故其占曰若能悔則可以征而吉矣

象曰困于葛藹未當也

動悔有悔吉行也



巽下坎上

井改邑不改井无喪无得往來井井汔至亦未繙井羸

其瓶凶

喪息浪反汔許訖反繙音橘羸律裴反○井者穴地出水之處以巽木入乎坎水之下而上出

其水故為井改邑不改井故无喪无得而往者來者皆井其井也汔幾也繙綆也羸敗也汲井幾至未盡綆而敗其瓶則凶也其占為事仍舊无得喪而又當敬勉不可幾成而敗也

○象曰巽乎水而

上水井井養而不窮也

上時掌反○以卦象釋卦名義

改邑不改井乃

以剛中也汔至亦未繙井未有功也羸其瓶是以凶也

以卦體釋卦辭无喪无得往來井井兩句意與不改井同故不復出剛中以二五而言未有功而敗其瓶所以

凶也○象曰木上有水井君子以勞民勸相上如字又時掌反勞力報

反相息亮反○木上有水津潤上行井之象也勞民者以君養民勸相者使民相養皆取井養之義○初

六井泥不食舊井无禽

泥乃計反○井以陽剛為泉上出為功初六以陰居下故為此

象蓋井不泉而泥則人所不食而禽鳥亦莫之顧也象曰井泥不食下也舊井无

禽時舍也

舍音捨○言為時所棄

○九二井谷射鮒甕敝漏

谷余六反

音育射石亦反鮒音附○九二剛中有泉之象然上无正應下比初六功不上行故其象如此象曰井

谷射鮒无與也○九三井渫不食為我心惻可用汲王

明並受其福

渫息列反○渫不停汚也井渫不食而使

施者受者並受其福也九三以陽居陽在下之上而未為時用故其象占如此

象曰井渫不食

行惻也求王明受福也

人行惻者行道之人皆以為惻也

○六四井甃无

咎

甃側救反○以六居四雖得其正然陰柔不泉則但能脩治而无及物之功故其象為井甃而占则无咎

占者能自脩治則雖无及物之功而亦可以无咎矣

象曰井甃无咎脩井也○九

五井冽寒泉食

冽音列○冽潔也陽剛中正功及於物故為此象占者有其德則契其象也

象曰寒泉之食中正也○上六井收勿幕有孚元吉

收詩

救反又如字幕音莫○收汲取也晁氏云收鹿盧收緇者也亦通幕蔽覆也有孚謂其出有源而不窮也井以上出為功而坎口不揜故上六雖非陽剛而其象如此然占者應之必有孚乃元吉也

象曰元吉

在上大成也



離下
兌上

革已日乃孚元亨利貞悔亡

革變革也兌澤在上離火在下火然則水乾水決則

火滅中少二女合為一卦而少上中下志不相得故其卦為革也變革之初人未之信故必已日而後信又以其內有文明之德而外有和說之氣故其占為有所更革皆大亨而得其正所革皆當而所革之悔亡也一有

不正則所革不信不通而反有悔矣

○象曰革水火相息二女同居其志

不相得曰革

以卦象釋卦名義大畧與睽相似然以相違而為睽相息而為革也息滅息也又為

生息之義滅息而後生息也

已日乃孚革而信之文明以說大亨以

正革而當其悔乃亡

說音悅當去聲以卦德釋卦辭

○天地革而四時

成湯武革命順乎天而應乎人革之時大矣哉

極言而贊其大

也

○象曰澤中有火革君子以治厯明時

治平聲○四時之變革之

大者○初九鞏用黃牛之革

鞏九勇反○雖當革時居初无應未可有為故為此象鞏

固也黃中色牛順物革所以固物亦取卦名而義不同也其占為當堅確固守而不可以有為聖人之於變革

其謹如此

象曰輦用黃牛不可以有為也○六二已日乃革

之征吉无咎

六二柔順中正而為文明之主有應於上於是可革矣然必已日然後革之則征

吉而无咎戒占者猶未可遽變也

象曰已日革之行有嘉也○九三征

凶貞厲革言三就有孚

過剛不中居離之極躁動於革者也故其占有征凶貞厲之戒

然其時則當革故至於革言三就則亦有孚而可革也

象曰革言三就又何之矣

言已

○九四悔亡有孚改命吉

以陽居陰故有悔然卦已過中水火之際乃革

之時而剛柔不偏又革之用也是以悔亡然又必有孚然後革乃可獲吉明占者有其德而當其時又必有信乃悔亡而得吉也

象曰改命之吉信志也○九五大人虎變未

占有孚

虎大人之象變謂希革而毛毯也在大人則自新新民之極順天應人之時也九五以陽剛中

正為革之主故有此象占而得此則有此應然亦必自其未占之時人已信其如此乃足以當之耳象曰

大人虎變其文炳也○上六君子豹變小人革面征凶

居貞吉

革道已成君子如豹之變小人亦革面以聽從矣不可以往而居正則吉變革之事非得已者

不可以過而上六之才亦不可以有行也故占者如之

象曰君子豹變其文蔚也

小人革面順以從君也

蔚紆胃反



巽下離上

鼎元吉亨

鼎烹飪之器為卦下陰為足二三四陽為腹五陰為耳上陽為鉉有鼎之象又以巽木入

離火而致烹飪鼎之用也故其卦為鼎下巽巽也上離為目而五為耳有內巽順而外聰明之象卦自巽來陰進居五而下應九二之陽故其占曰元亨吉衍文也○彖曰鼎象也以木巽火亨

飪也聖人亨以享上帝而大亨以養聖賢亨普庚反飪入甚反○以

卦體二象釋卦名義因極其大而言之亨帝貴誠巽而用犢而已養賢則饗飧牢禮當極其盛故曰大亨

耳目聰明柔進而上行得中而應乎剛是以元亨上時掌反

○以卦象卦變○象曰木上有火鼎君子以正位凝命

卦體釋卦辭

鼎重器也故有正位凝命之意凝猶至道不凝之疑傳所謂協于上下以承天休者也○初六鼎

顛趾利出否得妾以其子无咎出尺遂反又如字否音鄙○居鼎之下鼎趾之

象也上應九四則顛矣然當卦初鼎未有實而舊有否惡之積焉因其顛而出之則為利矣得妾而因得其子亦猶是也此爻之象如此而其占无咎蓋因敗以為功因賤以致貴也 象曰鼎顛趾未悖

也利出否以從貴也

鼎而顛趾悖道也而因可出否以從貴則未為悖也從貴謂應四亦

為取新之意

○九二鼎有實我仇有疾不我能即吉

仇音求以剛

居中鼎有實之象也我仇謂初陰陽相求而非正則相陷於惡而為仇矣二能以剛中自守則初雖近不能以就之是以其象如此而 象曰鼎有實慎所之也我仇有其占為如是則吉也

疾終无尤也

有實而不慎其所往則為仇所即而陷於惡矣

○九三鼎耳革其

行塞雉膏不食方雨虧悔終吉

行下孟反塞悉則反○以陽居鼎腹之中本有

美實者也。然以過剛失中，越五應上，又居下之極，為變革之時，故為鼎耳方革，而不可舉移。雖承上卦文明之腴，有雉膏之美，而不得以為人之食，然以陽居陽，為得其正，苟能自守，則陰陽將和而失其悔矣。占者如是，則初雖不利而終得吉也。

象曰：鼎耳革，失其義也。○九四鼎折足，覆

公餗其形渥凶。

折之舌反，覆方服反，餗送六反，渥乙角反。○晁氏曰：形渥，諸本作刑，劉謂重刑。

也。今從之。九四居上任重者也，而下應初六之陰，則不勝其任矣，故其象如此，而其占凶也。

象曰：覆

公餗，信如何也。

言失信也。

○六五鼎黃耳，金鉉利貞。

鉉，玄典反。○五

於象為耳，而有中德，故云黃耳。金堅剛之物，鉉貫耳以舉鼎者也。五虛中以應九二之堅剛，故其象如此，而其占則利在貞固而已。或曰：象曰鼎黃耳，中以為實也。○金鉉以上九而言更詳之。

上九鼎玉鉉大吉无不利

上於象為鉉而以陽居陰剛而能溫故有玉鉉之象而其

占為大吉无不利蓋有是德則如其占也

象曰玉鉉在上剛柔節也



震上

震亨震來虩虩笑言啞啞震驚百里不喪匕鬯

虩許逆反啞烏

客反喪息浪反匕必以反鬯勅亮反○震動也一陽始生於二陰之下震而動也其象為雷其屬為長子震有亨道震來當震之來時也虩虩恐懼驚顧之貌震驚百里以雷言匕所以舉鼎實鬯以秬黍酒和鬱金所以灌地降神者也不喪匕鬯以長子言也此卦之占為能恐懼則致福而不失其所主之重

○象曰震

亨

震有亨道不待言也

震來虩虩恐致福也笑言啞啞後有則也

恐致福恐懼以致福也則法也震驚百里驚遠而懼通也出可以守宗

廟社稷以為祭主也

程子以為通也下脫不喪亡也四

云出即電字之誤

○象曰洊雷震君子以恐懼脩省

洊在薦反省悉井反

○初九震來虩虩後笑言啞啞吉

成震之主處震之初故其占如此

象

曰震來虩虩恐致福也笑言啞啞後有則也○六二震

來厲億喪貝躋于九陵勿逐七日得

躋子西反○六二乘初九之剛故當

震之來而危厲也億字未詳又當喪其貨貝而升於九陵之上然柔順中正足以自守故不求而自獲也此文

占具象中但九陵七日之象則未詳耳

象曰震來厲乘剛也○六三震蘇

蘇震行无眚

蘇蘇緩散自失之狀以陰居陽當震時而居不正是以如此占者若因懼而能行以

去其不正則可以无眚矣

象曰震蘇蘇位不當也○九四震遂泥泥乃

計反○以剛處柔不中不正陷於二陰之間不能自震也遂者无反之意泥滯溺也

象曰震遂泥

未光也○六五震往來厲億无喪有事

喪息浪反○以六居五而處震

時无時而不危也以其得中故无所喪而能有事也占者不失其中則雖危无喪矣

象曰震往來

厲危行也其事在中大无喪也○上六震索索視矍矍

征凶震不于其躬于其鄰无咎婚媾有言

索桑落反矍俱縛反○以

陰柔處震極故為索索矍矍之象以是而行其凶必矣然能及其震未及其身之時恐懼脩省則可以无咎而

亦不能免於婚媾之有言戒占者當如是也

象曰震索索中未得也雖凶无

咎畏鄰戒也

中謂中心



艮下
艮上

艮其背不獲其身行其庭不見其人无咎

艮止也一陽止於二陰之

上陽自下升極上而止也其象為山取坤地而隆其上之狀亦止於極而不進之意也其占則必能止于背而不有其身行其庭而不見其人乃无咎也蓋身動物也唯背為止艮其背則止於所當止也止於所當止則不隨身而動矣是不有其身也如是則雖行於庭除有人之地而亦不見其人矣蓋艮其背而不獲其身者止而止也行其庭而不見其人者行而止也動靜各止其所而皆主夫靜焉所以得无咎也

○象曰艮

止也時止則止時行則行動靜不失其時其道光明

此釋

卦名艮之義則止也然行止各有其時故時止而止止也時行而行亦止也艮體篤實故又有光明之義大畜於艮亦以艮其止止其所也上下敵應不相與也是以

不獲其身行其庭不見其人无咎也

此釋卦辭易背為止以明背即止也

背者止之所也以卦體言内外之卦陰陽敵應而不相與也不相與則内不見已外不見人而无咎矣晁氏云

艮其止當依卦辭作背

○象曰兼山艮君子以思不出其位○初

六艮其趾无咎利永貞

以陰柔居艮初為艮趾之象占者如之則无咎而又以其陰柔

故又戒其利永貞也象曰艮其趾未失正也○六二艮其腓不拯

其隨其心不快

極之凌反○六二居中得正既止其腓矣三為限則腓所隨也而過剛不中以

止乎上二雖中正而體柔弱不能往而拯之是以其心不快也此爻占在象中下爻放此

象曰不拯

其隨未退聽也

三止乎上亦不肯退而聽乎二也

○九三艮其限列其

夤厲熏心

夤引真反○艮身上下之際即腰膂也夤脅也止于腓則不進而已九三以過剛不中當

限之處而艮其限則不得屈伸而上下判隔如列其夤矣危厲熏心不安之甚也

象曰艮其限

危熏心也○六四艮其身无咎

以陰居陰時止而止故為艮其身之象而占得

无咎也

象曰艮其身止諸躬也○六五艮其輔言有序悔

亡

六五當輔之處故其象如此而其占悔亡也悔謂以陰居陽

象曰艮其輔以中正

也

正字羨文
叶韻可見

○上九敦艮吉

以陽剛居止之極
敦厚於止者也

象曰敦

艮之吉以厚終也



艮下
巽上

漸女歸吉利貞

漸漸進也為卦止於下而巽於上為不
遽進之義有女歸之象焉又自二至五

位皆得正故其占為女
歸吉而又戒以利貞也

○彖曰漸之進也女歸吉也

之

疑衍或進得位往有功也進以正可以正邦也

以卦變
釋利貞

之意蓋此卦之變自渙而來九進居三
自旅而來九進居五皆為得位之正

其位剛得中也

以卦體言
謂九五也

止而巽動不窮也

以卦德言
漸進之意

○象曰山上有

木漸君子以居賢德善俗

二者皆當以漸而進疑賢字衍或善下有脫字

○初

六鴻漸于干小子厲有言无咎

鴻之行有序而進有漸干水涯也始進於下未

得所安而上復无應故其象如此而其占則為小子厲雖有言而於義则无咎也

象曰小子之

厲義无咎也○六二鴻漸于磐飲食衎衎吉

衎苦旦反○磐大石

也漸遠於水進於磐而益安矣衎衎和樂意六二柔順中正進以其漸而上有九五之應故其象如此而占則吉

象曰飲食衎衎不素飽也

素飽如詩言素餐得之以道則不為徒飽而處之安

矣○九三鴻漸于陸夫征不復婦孕不育凶利禦寇

復房

六反○鴻水鳥陸非所安也九三過剛不中而无應故其象如此而其占夫征則不復婦孕則不育凶莫甚焉

然以其過剛也故利禦寇

象曰夫征不復離羣醜也婦孕不育失其

道也利用禦寇順相保也

離力智反

○六四鴻漸于木或得

其桷无咎

桷音角○鴻不木棲桷平柯也或得平柯則可以安矣六四乘剛而順巽故其象如此占

者如之則无咎也

象曰或得其桷順以巽也○九五鴻漸于陵

婦三歲不孕終莫之勝吉

陵高阜也九五居尊六二正應在下而為三四所隔然終

不能奪其正也故其象如此而占者如是則吉也

象曰終莫之勝吉得所願也

○上九鴻漸于陸其羽可用為儀吉

胡氏程氏皆云陸當作達謂雲路也

今以韻讀之良是儀羽旄旌纛之飾也上九至高出乎人位之外而其羽毛可用以為儀飾位雖極高而不為

无用之象故其占為如是則吉也

象曰其羽可用為儀吉不可亂也

漸進

愈高而不為无用其志卓然豈可得而亂哉



兌下震上

歸妹征凶无攸利

婦人謂嫁曰歸妹少女也兌以少女而從震之長男而其情又為以說而

動皆非正也故卦為歸妹而卦之諸爻自二至五皆不得正三五又皆以柔乘剛故其占征凶而无所利也

○彖曰歸妹天地之大義也天地不交而萬物不興歸

妹人之終始也

釋卦名義也歸者女之終生育者人之始

說以動所歸妹也

說音悅○又以卦德言之

征凶位不當也无攸利柔乘剛也

又以卦體釋卦

辭男女之交本皆正理唯
若此卦則不得其正也

○象曰澤上有雷歸妹君子

以永終知敝

雷動澤隨歸妹之象君子觀其合之不正知其終之有敝也推之事物莫不皆然

○初九歸妹以娣跛能履征吉

娣音弟跛波我反○初九居下而无正應故為

娣象然陽剛在女子為賢正之德但為娣之賤僅能承助其君而已故又為跛能履之象而其占則征吉也

象曰歸妹以娣以恒也跛能履吉相承也

恒謂有常久之德

○

九二眇能視利幽人之貞

眇能視承上爻而言九二陽剛得中女之賢也上有正應

而反陰柔不正乃女賢而配不良不能大成內助之功故為眇能視之象而其占則利幽人之貞也幽人亦抱道守正而不偶者也

象曰利幽人之貞未變常也○六三歸妹以

須反歸以娣

六三陰柔而不中正又為說之主女之不正人莫之取者也故為未得所適而反歸

為娣之象或曰須女之賤者

象曰歸妹以須未當也○九四歸妹愆

期遲歸有時

九四以陽居上體而无正應賢女不輕從人而愆期以待所歸之象正與六三相反

象曰愆期之志有待而行也○六五帝乙歸妹其君之

袂不如其娣之袂良月幾望吉

袂彌計反○六五柔中居尊下應九二尚德而

不貴飾故為帝女下嫁而服不盛之象然女德之盛无以加此故又為月幾望之象而占者如之則吉也象

曰帝乙歸妹不如其娣之袂良也其位在中以貴行也

以其有中德之貴而行故不尚飾

○上六女承筐无實士刲羊无血无

攸利

卦苦圭反○上六以陰柔居歸妹之終而无應約婚而不終者也故其象如此而於占為无所利也

象曰上六无實承虛筐也

三三

離下震上

豐亨王假之勿憂宜日中

假更白反○豐大也以明而動盛大之勢也故其占有亨

道焉然王者至此盛極當衰則又有憂道焉聖人以為徒憂无益但能守常不至於過盛則可矣故戒以勿憂

宜日中也

○彖曰豐大也明以動故豐

以卦德釋卦名義

王假之尚

大也勿憂宜日中宜照天下也

釋卦辭

日中則昃月盈則

食天地盈虛與時消息而況於人乎況於鬼神乎

此又發明

卦辭外意言不可過中也

○象曰雷電皆至豐君子以折獄致刑

折之

舌反○取其威照並行之象

○初九遇其配主雖旬无咎往有尚

主配

謂四旬均也謂皆陽也當豐之時明動相資故初九之遇九四雖皆陽剛而其占如此也

象曰雖旬

无咎過旬災也

戒占者不可求勝其配亦爻辭外意

○六二豐其蔀日中

見斗往得疑疾有孚發若吉

蔀音部○六二居豐之時為離之主至明者也而上

應六五之柔暗故為豐蔀見斗之象蔀障蔽也大其障蔽故日中而昏也往而從之則昏暗之主必反見疑唯在積其誠意以感發之則吉戒象曰有孚發若信以發

志也○九三豐其沛日中見沫折其右肱无咎

沫昧同莫佩反

折食列反○沛一作旆謂幡幔也其蔽甚於節矣沫小星也三處明極而應上六雖不可用而非咎也故其象占如象曰豐其沛不可大事也折其右肱終不可用也此

○九四豐其蔀日中見斗遇其夷主吉

象與六二同夷等夷也謂初九

也其占為當豐而遇暗主下就同德則吉也

象曰豐其蔀位不當也日中見

斗幽不明也遇其夷主吉行也○六五來章有慶譽吉

質雖柔暗若能來致天下之明則有慶譽而吉矣蓋因其柔暗而設此以開之占者能如是則如其占矣象

曰六五之吉有慶也○上六豐其屋蔀其家闕其戶闕

其无人三歲不覿凶

闕苦鷄反○以陰柔居豐極處動終明極而反暗者也故為豐大其

屋而反以自蔽之象无人不覲亦言障蔽之深其凶甚矣

象曰豐其屋天際翔也闕

其戶闐其无人自藏也

藏謂障蔽



艮下離上

旅小亨旅貞吉

旅羈旅也山止於下火炎於上為去其所止而不處之象故為旅以六五得中

於外而順乎上下之二陽艮止而離麗於明故其占可以小亨而能守其旅之貞則吉旅非常居若可苟者然道无不在故自有其正不可須臾離也

○彖曰旅小亨柔得中乎外而順

乎剛止而麗乎明是以小亨旅貞吉也

以卦體卦德釋卦辭

旅之

時義大矣哉

旅之時為難處

○象曰山上有火旅君子以明慎

用刑而不留獄

慎刑如山
不留如火

○初六旅瑣瑣斯其所取災

當旅之時以陰柔居下位故其象占如此

象曰旅瑣瑣志窮災也○六二旅

即次懷其資得童僕貞

即次則安懷資則裕得其童僕之貞信則无欺而有賴旅之最

吉者也二有柔順中正之德故其象占如此

象曰得童僕貞終无尤也○九

三旅焚其次喪其童僕貞厲

喪息浪反象同○過剛不中居下之上故其象占如

此喪其童僕則不止於失其心矣故貞字連下句為義

象曰旅焚其次亦以傷矣

以旅與下其義喪也

以旅之時而與下之道如此義當喪也

○九四旅于

處得其資斧我心不快

以陽居陰處上之下用柔能下故其象占如此然非其正位又

上无剛陽之與下唯陰柔之應故其心有所不快也

象曰旅于處未得位也得其

資斧心未快也○六五射雉一矢亡終以譽命

射石亦反○雉

文明之物離之象也六五柔順文明又得中道為離之主故得此爻者為射雉之象雖不无亡矢之費而所喪不多終有譽命也象曰終以譽命上逮也

上逮言其譽命聞於上也

○上九

鳥焚其巢旅人先笑後號咷喪牛于易凶

喪易並去聲○上九過剛

處旅之上離之極驕而不順凶之道也故其象占如此

象曰以旅在上其義焚也

喪牛于易終莫之聞也



巽下
巽上

巽小亨利有攸往利見大人

巽入也一陰伏於二陽之下其性能巽以入也其象

為風亦取入義陰為主故其占為小亨以陰從陽故又利有所往然必知所從乃得其正故又曰利見大人也

○彖曰重巽以申命

釋卦義也巽順而入必究乎下命令之象重巽故為申命也

剛

巽乎中正而志行柔皆順乎剛是以小亨利有攸往利

見大人

以卦體釋卦辭剛巽乎中正而志行指九五柔謂初四

○象曰隨風巽君

予以申命行事

隨相繼之義

○初六進退利武人之貞

初以陰居

下為巽之主卑巽之過故為進退不果之象若以武人之貞處之則有以濟其所不及而得所宜矣

象曰

進退志疑也利武人之貞志治也○九二巽在牀下用

史巫紛若吉无咎

二以陽處陰而居下有不安之意然當異之時不厭其卑而二又居中不

至已甚故其占為能過於巽而丁寧煩悉其辭以自道達則可以吉而无咎亦竭誠意以祭祀之吉占也象

曰紛若之吉得中也○九三頻巽吝

過剛不中居下之上非能巽者勉為

屢失吝之道也故其象占如此

象曰頻巽之吝志窮也○六四悔亡田

獲三品

陰柔无應承乘皆剛宜有悔也而以陰居陰處上之下故得悔亡而又為卜田之吉占也三品

者一為乾豆一為賓客一以充庖

象曰田獲三品有功也○九五貞吉

悔亡无不利无初有終先庚三日後庚三日吉

先西薦反後胡

豆反○九五剛健中正而居巽體故有悔以有貞而吉也故得亡其悔而无不利有悔是无初也亡之是有終

也庚更也事之變也先庚三日丁也後庚三日癸也丁所以丁寧於其變之前癸所以揆度於其變之後有所變更而得此占者如是則吉也

象曰九五之吉位正中也○上九巽在

牀下喪其資斧貞凶

喪息浪反下同○巽在牀下過於巽者也喪其資斧失所以斷也如

是則雖貞亦凶矣居巽之極失其陽剛之德故其象占如此

象曰巽在牀下上窮也

喪其資斧正乎凶也

正乎凶言必凶



兌下
兌上

兌亨利貞

兌說也一陰進乎二陽之上喜之見乎外也其象為澤取其說萬物又取坎水而塞其下

流之象卦體剛中而柔外剛中故說而亨柔外故利於貞蓋說有亨道而其妄說不可以不戒故其占如此又

柔外故為說亨剛中
故利於貞亦一義也

○彖曰兌說也

說音悅下同
○釋卦名義

剛中

而柔外說以利貞是以順乎天而應乎人說以先民民

忘其勞說以犯難民忘其死說之大民勸矣哉

先西薦
反又如

字難乃旦反○以卦
體釋卦辭而極言之

○象曰麗澤兌君子以朋友講習

兩澤相麗互相滋益
朋友講習其象如此

○初九和兌吉

以陽爻居說體而
處最下又无係應

故其象
占如此

象曰和兌之吉行未疑也

居卦之初其說也
正未有所疑也

○

九二孚兌吉悔亡

剛中為孚居陰為悔占者
以孚而說則吉而悔亡矣

象曰孚兌

之吉信志也○六三來兌凶

陰柔不中正為兌之主上
无所應而反來就二陽以

求說凶之道也

象曰來兌之凶位不當也○九四商兌未寧介

疾有喜

四上承九五之中正而下比六三之柔邪故不能決而商度所說未能有定然質本陽剛故能

介然守正而疾惡柔邪也如此則有喜矣象占如此為戒深矣

象曰九四之喜有慶也

○九五孚于剝有厲

剝謂陰能剝陽者也九五陽剛中正然當說之時而居尊位密近上

六上六陰柔為說之主處說之極能妄說以剝陽者也故其占但戒以信于上六則有危也

象曰孚

于剝位正當也

與履九五同

○上六引兌

上六成說之主以陰居說之極引下

二陽相與為說而不能必其從也故九五當戒而此爻不言其吉凶

象曰上六引兌未光

也



坎下
巽上

渙亨王假有廟利涉大川利貞

渙呼亂反假庚白反○
渙散也為卦下坎上巽

風行水上離披解散之象故為渙其變則本自漸卦九
來居二而得中六往居三得九之位而上同於四故其
占可亨又以祖考之精神既散故王者當至於廟以聚
之又以巽木坎水舟楫之象故利涉大川其曰利貞則
占者之深戒也○象曰渙亨剛來而不窮柔得位乎外而上同

上如字又時掌反
○以卦變釋卦辭

王假有廟王乃在中也

中謂廟中

利涉大

川垂木有功也○象曰風行水上渙先王以享于帝立

廟

皆所以合其散

○初六用拯馬壯吉

居卦之初渙之始也始
渙而拯之為力既易又

有壯馬其吉可知初六非有濟渙之
才但能順乎九二故其象占如此
象曰初六之吉順

也○九二渙奔其机悔亡
机音几○九而居二宜有悔也然當渙之時來而不窮能

亡其悔者也故其象占
如此蓋九奔而二机也
象曰渙奔其机得願也○六三

渙其躬无悔
陰柔而不中正有私於己之象也然居得陽位志在濟時能散其私以得无悔故其

占如此大率此上四爻
皆因渙以濟渙者也
象曰渙其躬志在外也○六四

渙其羣元吉渙有丘匪夷所思
居陰得正上承九五當濟渙之任者也下无應

與為能散其朋黨之象占者如是則大善而吉又言能
散其小羣以成大羣使所散者聚而若丘則非常人思

慮之所
及也
象曰渙其羣元吉光大也○九五渙汗其大號

渙王居无咎

陽剛中正以居尊位當渙之時能散其號令與其居積則可以濟渙而无咎矣故其

象占如此九五異體有號令之象汗謂如汗之出而不反也渙王居如陸贄所謂散小儲而成大儲之意象

曰王居无咎正位也○上九渙其血去逖出无咎

去起反

○上九以陽居渙極能出乎渙故其象占如此血謂傷害逖當作惕與小畜六四同言渙其血則去渙其惕則

出也象曰渙其血遠害也遠衰萬反



兌下坎上

節亨苦節不可貞

節有限而止也為卦下兌上坎澤上有水其容有限故為節節固自有亨

道矣又其體陰陽各半而二五皆陽故其占得亨然至於太甚則苦矣故又戒以不可守以為貞也

○象

曰節亨剛柔分而剛得中

以卦體釋卦辭

苦節不可貞其道窮

也

又以理言

說以行險當位以節中正以通

說音悅○又以卦德卦體言之

當位中正指五又坎為通

天地節而四時成節以制度不傷財不害

民

極言節道

○象曰澤上有水節君子以制數度議德行

行下

孟反○初九不出戶庭无咎

戶庭戶外之庭也陽剛得正居節之初未可以行能節而

止者也故其象占如此

象曰不出戶庭知通塞也

塞悉則反

○九二不

出門庭凶

門庭門內之庭也九二當可行之時而失剛不正上无應與知節而不知通故其象占如

此

象曰不出門庭凶失時極也○六三不節若則嗟若

无咎

陰柔而不中正以當節時非能節者故其象占如此

象曰不節之嗟又誰咎

也

此无咎與諸爻異言无所歸咎也

○六四安節亨

柔順得正上承九五自然有節者也

故其象占如此

象曰安節之亨承上道也○九五甘節吉往有

尚

所謂當位以節中正以通者也故其象占如此

象曰甘節之吉居位中也○

上六苦節貞凶悔亡

居節之極故為苦節既處過極故雖得正而不免於凶然禮奢寧儉

故雖有悔而終得亡之也

象曰苦節貞凶其道窮也



兌下巽上

中孚豚魚吉利涉大川利貞

孚信也為卦二陰在內四陽在外而二五之陽皆得

其中以一卦言之為中虛以二體言之為中實皆孚信之象也又下說以應上上巽以順下亦為孚義豚魚无知之物又木在澤上外實內虛皆舟楫之象至信可感豚魚涉險難而不可以失其貞故占者能致豚魚之應則吉而利涉大川

○彖曰中孚柔在內而剛得中說而又必利於貞也

巽孚乃化邦也

說音悅○以卦體卦德釋卦名義

豚魚吉信及豚魚也

利涉大川乘木舟虛也

以卦象言

中孚以利貞乃應乎天也

信而正則應乎天矣

○象曰澤上有風中孚君子以議獄緩死

風感

水受中孚之象議獄緩死中孚之意

○初九虞吉有他不燕

他湯何反當中孚之初

○

上應六四能度其可信而信之則吉復有他焉則失其所以度之之正而不得其所安矣戒占者之辭也

象

曰初九虞吉志未變也○九二鳴鶴在陰其子和之我

有好爵吾與爾靡之

和胡臥反靡亡池反○九二中孚之實而九五亦以中孚之實應之

故有鶴鳴子和我爵爾靡之象鶴在陰謂九居二好爵謂得中靡與縻同言懿德人之所好故好爵雖我之所獨有而彼亦係戀之也象曰其子和之中心願也○六三得敵或

鼓或罷或泣或歌

敵謂上九信之窮者六三陰柔不中正以居說極而與之為應故不能自

主而其象如此

象曰或鼓或罷位不當也○六四月幾望馬匹

亡无咎

幾音機望无方反○六四居陰得正位近於君為月幾望之象馬匹謂初與已為匹四乃絕之

而上以信於五故為馬匹亡之象占者如是則无咎也

象曰馬匹亡絕類上也

上上

聲

○九五有孚攣如无咎

攣力圓反○九五剛健中正中孚之實而居尊位為孚之

主者也下應九二與之同德故其象占如此

象曰有孚攣如位正當也○上

九翰音登于天貞凶

居信之極而不知變雖得其貞亦凶道也故其象占如此雞曰翰音

乃巽之象居巽之極為登于天雞非登天之物而欲登天信非所信而不知變亦猶是也

象曰翰音

登于天何可長也



艮下震上

小過亨利貞可小事不可大事飛鳥遺之音不宜上宜

下大吉

小謂陰也為卦四陰在外二陽在內陰多於陽小者過也既過於陽可以亨矣然必利於守貞

則又不可以不戒也卦之二五皆以柔而得中故可小事三四皆以剛失位而不中故不可大事卦體內實外虛如鳥之飛其聲下而不上故能致飛鳥遺音之應則宜下而大吉亦不可大事之類也○彖曰小

過小者過而亨也

以卦體釋卦名義與其辭

過以利貞與時行也柔

得中是以小事吉也

以二五言

剛失位而不中是以不可大

事也

以三四言

有飛鳥之象焉飛鳥遺之音不宜上宜下大

吉上逆而下順也

以卦體言

○彖曰山上有雷小過君子以

行過乎恭喪過乎哀用過乎儉

山上有雷其聲小過三者之過皆小者之過可

過於小而不可過於大可以小過而不可甚過象所謂可小事而宜下者也

○初六飛鳥以

凶初六陰柔上應九四又居過時上而不下者也飛鳥遺音不宜上宜下故其象占如此郭璞洞林占得此

者或致羽蟲之孽

象曰飛鳥以凶不可如何也○六二過其祖

遇其妣不及其君遇其臣无咎

六二柔順中正進則過三四而遇六五是過陽

而反遇陰也如此則不及六五而自得其分是不及君而適遇其臣也皆過而不過守正得中之意无咎之道

也故其象占如此

象曰不及其君臣不可過也

所以不及君而還遇臣者以臣

不可過故也

○九三弗過防之從或戕之凶

戕在良反○小過之時事每當

過然後得中九三以剛居正衆陰所欲害者也而自恃其剛不肯過為之備故其象占如此若占者能過防之

則可以免矣

象曰從或戕之凶如何也○九四无咎弗過遇

之往厲必戒勿用永貞

當過之時以剛處柔過乎恭矣无咎之道也弗過遇之言弗過

於剛而適合其宜也往則過矣故有厲而當戒陽性堅剛故又戒以勿用永貞言當隨時之宜不可固守也或曰弗過遇之若以六二爻例則當如此說若依九三爻例則過遇當如過防之義未詳孰是當闕以俟知者

象曰弗過遇之位不當也往厲必戒終不可長也

爻義未明

此亦當闕

○六五密雲不雨自我西郊公弋取彼在穴

弋餘職反

○以陰居尊又當陰過之時不能有為而弋取六二以為助故有此象在穴陰物也兩陰相得其不能濟大事

可知象曰密雲不雨已上也

已上太高也

○上六弗遇過之飛

鳥離之凶是謂災眚

眚生領反○六以陰居動體之上處陰過之極過之已高而甚遠者

也故其象占如此或曰遇過恐亦只當作過遇義同九四未知是否象曰弗遇過之已亢也



離下坎上

既濟亨小利貞初吉終亂

既濟事之既成也為卦水火相交各得其用六爻之位各

得其正故為既濟亨小當為小亨大抵此卦及六爻占辭皆有警戒之意時當然也

○彖曰既濟

亨小者亨也

濟下疑脫小字

利貞剛柔正而位當也

以卦體言

初吉

柔得中也

指六二

終止則亂其道窮也○象曰水在火上

既濟君子以思患而豫防之○初九曳其輪濡其尾无

咎

曳以制反濡音如○輪在下尾在後初之象也曳輪則車不前濡尾則狐不濟既濟之初謹戒如是无咎

之道占者如是則无咎矣

象曰曳其輪義无咎也○六二婦喪其茀

勿逐七日得

喪息浪反茀力佛反○二以文明中正之德上應九五剛陽中正之君宜得行其志

而九五居既濟之時不能下賢以行其道故二有婦喪其茀之象茀婦車之蔽言失其所以行也然中正之道不可終廢時過則行矣故又有勿逐而自得之戒

象曰七日得以中道也○九

三高宗伐鬼方三年克之小人勿用

既濟之時以剛居剛高宗伐鬼方之

象也三年克之言其久而後克戒占者不可輕動之意小人勿用占法與師上六同

象曰三年克

之億也

億蒲拜反

○六四繻有衣袽終日戒

繻而朱反袽女居反○既濟之

時以柔居柔能預備而戒懼者也故其象如
此程子曰縹當作濡衣袂所以塞舟之罅漏
象曰終日

戒有所疑也○九五東鄰殺牛不如西鄰之禴祭實受

其福

東陽西陰言九五居尊而時已過不如六二之下而始得時也又當文王與紂之事故其象占如

此象辭初吉終亂亦此意也

象曰東鄰殺牛不如西鄰之時也實受

其福吉大來也○上六濡其首厲

既濟之極險體之上而以陰柔處之為狐

涉水而濡其首之象占者不戒危之道也

象曰濡其首厲何可久也



坎下離上

未濟亨小狐汔濟濡其尾无攸利

汔許訖反○未濟事未成之時也水火不

交不相為用卦之六爻皆失其位故為未濟汔幾也幾濟而濡尾猶未濟也占者如此何所利哉

○象

曰未濟亨柔得中也

指六五言

小狐汔濟未出中也濡其尾

无攸利不續終也雖不當位剛柔應也○象曰火在水

上未濟君子以慎辨物居方

水火異物各居其所故君子觀象而審辨之

○

初六濡其尾吝

以陰居下當未濟之初未能自進故其象占如此

象曰濡其尾

亦不知極也

極字未詳考上下韻亦不叶或恐是敬字今且闕之

○九二曳其輪

貞吉

以九二應六五而居柔得中為能自止而不進得為下之正也故其象占如此

象曰九二

貞吉中以行正也

九居二本非正中故得正也

○六三未濟征凶利

涉大川

陰柔不中正居未濟之時以征則凶然以柔乘剛將出乎坎有利涉之象故其占如此蓋行者

可以水浮而不可以陸走也或疑利字上當有不字

象曰未濟征凶位不當也○

九四貞吉悔亡震用伐鬼方三年有賞于大國

以九居四不正

而有悔也能勉而貞則悔亡矣然以不貞之資欲勉而貞非極其陽剛用力之久不能也故為伐鬼方三年而受賞象曰貞吉悔亡志行也○六五貞吉无悔君子之

光有孚吉

以六居五亦非正也然文明之主居中應剛虛心以求下之助故得貞而吉且无悔又有

光輝之盛信實而不妄吉而又吉也

象曰君子之光其暉吉也

暉者光之散也○

上九有孚于飲酒无咎濡其首有孚失是

以剛明居未濟之極時將

可以有為而自信自養以俟命无咎之道也若縱而不
反如狐之涉水而濡其首則過於自信而失其義矣
象曰飲酒濡首亦不知節也

周易本義卷二

欽定四庫全書薈要卷一百九十六

經部

周易本義卷三

宋 朱子 撰

繫辭上傳

傳去聲
後同

繫辭本謂文王周公所作之辭繫于卦爻之下者即今經文此篇乃孔子所述繫辭之傳也以其通論一經之大體凡例故无經可附而自分上下云

天尊地卑乾坤定矣卑高以陳貴賤位矣動靜有常剛柔斷矣方以類聚物以羣分吉凶生矣在天成象在地

成形變化見矣

斷丁亂反見賢遍反○天地者陰陽形氣之實體乾坤者易中純陰純陽之卦

名也卑高者天地萬物上下之位貴賤者易中卦爻上下之位也動者陽之常靜者陰之常剛柔者易中卦爻陰陽之稱也方謂事情所向言事物善惡各以類分而吉凶者易中卦爻占決之辭也象者日月星辰之屬形者山川動植之屬變化者易中著策卦爻陰變為陽陽化為陰者也此言聖人作易因陰陽之實體為卦爻之法象莊周所謂易以是故剛柔相摩八卦相盪盪徒浪道陰陽此之謂也

言易卦之變化也六十四卦之初剛柔兩畫而已兩相摩而為四四相摩而為八八相盪而為六十四鼓

之以雷霆潤之以風雨日月運行一寒一暑此變化之成象者

乾道成男坤道成女此變化之成形者此兩節又明易之見於實體者與上文相發明也

乾知大始坤作成物知猶主也乾主始物而坤作成之承上文男女而言乾坤之理蓋凡

物之屬乎陰陽者莫不如此大抵陽先陰後陽施陰受陽之輕清未形而陰之重濁有迹也 乾以易

知坤以簡能

易以鼓反。乾健而動即其所知便能始物而无所難故為以易而知大始坤順而

靜凡其所能皆從乎陽而不

自作故為以簡而能成物 易則易知簡則易從易知

則有親易從則有功有親則可久有功則可大可久則

賢人之德可大則賢人之業

心人之所為如乾之易則其明白而人易知如坤之

簡則其事要約而人易從易知則與之同心者多故有親易從則與之協力者衆故有功有親則一於內故可久有功則兼於外故可大德謂得於已者業謂成於事者上言乾坤之德不同此言人法乾坤之道至此則可
以為易簡而天下之理得矣天下之理得而成位乎其賢矣

中矣

成位謂成人之位其中謂天地之中至此則體道之極功聖人之能事可以與天地參矣

右第一章

此章以造化之實明作經之理又言乾坤之理分見於天地而人兼體之也 乾

聖人設卦觀象繫辭焉而明吉凶

象者物之似也此言聖人作易觀卦爻之

象而繫以辭也

剛柔相推而生變化

言卦爻陰陽迭相推盪而陰或變陽陽或化陰聖人

所以觀象而繫辭衆人所以因著而求卦者也

是故吉凶者失得之象也悔吝

者憂虞之象也

吉凶悔吝者易之辭也得失憂虞者事之變也得則吉失則凶憂虞雖未至凶

然已足以致悔而取羞矣蓋吉凶相對而悔吝居其中

中或有此象則繫之以此辭也

變化者進退之象也剛柔者晝夜之象

也六爻之動三極之道也

柔變而趨於剛者退極而進也剛化而趨於柔者進極而

退也既變而剛則晝而陽矣既化而柔則夜而陰矣六爻初二為地三四為人五上為天動即變化也極至也

三極天地人之至理三才各一太極也此明剛柔相推以生變化而變化之極復為剛柔流行於一卦六爻之

閒而占者得因所是故君子所居而安者易之序也所值以斷吉凶也

樂而玩者爻之辭也

樂音洛。易之序謂卦爻所著是事理當然之次第玩者觀之詳是

故君子居則觀其象而玩其辭動則觀其變而玩其占

是以自天祐之吉无不利

象辭變已見上凡單言變者化在其中占謂其所值吉凶

也之決

右第二章

此章言聖人作易君子學易之事

彖者言乎象者也爻者言乎變者也

彖謂卦辭文王所作爻謂爻辭周

公所作者象指全體而言變指一節而言

吉凶者言乎其失得也悔吝者言

乎其小疵也无咎者善補過也

此卦爻辭之通例

是故列貴賤

者存乎位齊小大者存乎卦辯吉凶者存乎辭

位謂六爻之位

齊猶定也小謂陰大謂陽

憂悔吝者存乎介震无咎者存乎悔

上悔乎罪

反下悔呼對反○介謂辯別之端蓋善惡已動而未形之時也於此憂之則不至於悔吝矣震動也知悔則有以動其補過之心而可以无咎矣

是故卦有小大辭有險易辭也者各

指其所之

易以豉反。○小陰大易各隨所向

右第三章

此章釋卦爻辭之通例

易與天地準故能彌綸天地之道

易書卦爻具有天地之道與之齊準彌如

彌縫之彌有終竟聯合之意綸有選擇條理之意

仰以觀於天文俯以察於地

理是故知幽明之故原始反終故知死生之說精氣為

物游魂為變是故知鬼神之情狀

此窮理之事以者聖人以易之書也易者

陰陽而已幽明死生鬼神皆陰陽之變天地之道也天文則有晝夜上下地理則有南北高深原者推之於前反者要之於後陰精陽氣聚而成物神與天地相似故之伸也魂游魄降散而為變鬼之歸也

不違知周乎萬物而道濟天下故不過旁行而不流樂

天知命故不憂安土敦乎仁故能愛

知音智樂音洛知命之知如字○此

聖人盡性之事也天地之道知仁而已知周萬物者天

道濟天下者也知且仁則知而不過矣旁行者權

行之知也不流者守正之仁也既樂天理而又知天命

故能无憂而其知益深隨處皆安而无一息之不仁故

能不忘其濟物之心而仁益篤蓋仁者愛

之理愛者仁之用故其相為表裏如此 範圍天地之

化而不過曲成萬物而不遺通乎晝夜之道而知故神

无方而易无體 此聖人至命之事也範如鑄金之有模

範圍匡郭也天地之化无窮而聖人為

之範圍不使過於中道所謂裁成者也通猶兼也晝夜

即幽明生死鬼神之謂如此然後可見至神之妙无有

方所易之變化
无有形體也

右第四章

此章言易道之大
聖人用之如此

一陰一陽之謂道

陰陽迭運者氣也
其理則所謂道

繼之者善也成之

者性也

道具於陰而行乎陽繼言其發也
功陽之事也成言其具也性謂物之所謂化育之物

生則有性而各具是道也陰之仁者見之謂之仁知者
事也周子程子之書言之備矣

見之謂之知百姓日用而不知故君子之道鮮矣

知音
智不

知之知如字鮮息淺反○仁陽知陰各得是道之一隅
故隨其所見而目為全體也日用不知則莫不飲食鮮
能知味者又其每下者也然亦莫不有是道焉或曰上
章以知屬乎天仁屬乎地與此不同何也曰彼以清濁

言此以顯諸仁藏諸用鼓萬物而不與聖人同憂盛德
動靜言

大業至矣哉

顯自內而外也仁謂造化之功德之發也
藏自外而內也用謂機緘之妙業之本也

程子曰天地无心而成
化聖人有心而无為一

富有之謂大業日新之謂盛德

張子曰富有者大而無
外日新者久而無窮

生生之謂易

陰生陽陽生陰其
變無窮理與書皆

然成象之謂乾效法之謂坤

效呈也法謂造化
之詳密而可見者

極數知

來之謂占通變之謂事

占筮也事之未定者屬乎陽也
事行事也占之已決者屬乎陰

也極數知來所以通事之變張忠
定公言公事有陰陽意蓋如此

陰陽不測之謂神

張

曰兩在
故不測

右第五章

此章言道之體用不外乎陰陽而其所以然者則未嘗倚於陰陽也

夫易廣矣大矣以言乎遠則不禦以言乎邇則靜而正

以言乎天地之間則備矣

夫音扶下同。不禦言無盡靜而正言即物而理存備言

无所不有夫乾其靜也專其動也直是以大生焉夫坤其靜

也翕其動也闢是以廣生焉

翕虛級反闢婢亦反。乾坤各有動靜於其四德見

之靜體而動用靜別而動交也乾一而實故以質言而曰大坤二而虛故以量言而曰廣蓋天之形雖包於地之外而其氣常行乎地之中廣大配天地變通配四時

也易之所以廣大者以此

易以鼓反。易之廣大變通與其所

言陰陽之說易簡之德
配之天道人事則如此

右第六章

子曰易其至矣乎夫易聖人所以崇德而廣業也知崇

禮卑崇效天卑法地

知音智。十翼皆夫子所作不應自著子曰字疑皆後人所加也窮

理則知崇如天而德崇循理則禮卑如地而業廣此其取類又以清濁言也

天地設位而易

行乎其中矣成性存存道義之門

猶知禮存性而變化行

出也成性本成之性也存存謂存而又存不已之意也

右第七章

聖人有以見天下之賾而擬諸其形容象其物宜是故

謂之象

賾雜亂也象卦之象如說卦所列者

聖人有以見天下之動而觀

其會通以行其典禮繫辭焉以斷其吉凶是故謂之爻

斷丁玩反○會謂理之所聚而不可遺處通謂理之可行而无所礙處如庖丁解牛會則其族而通則其虛也

言天下之至賾而不可惡也言天下之至動而不可亂

也惡烏路反○惡猶厭也擬之而後言議之而後動擬議以成其

變化

觀象玩辭觀變玩占而法行之此下七爻則其例也

鳴鶴在陰其子和之我

有好爵吾與爾靡之子曰君子居其室出其言善則千

里之外應之況其邇者乎居其室出其言不善則千里之外違之況其邇者乎言出乎身加乎民行發乎邇見乎遠言行君子之樞機樞機之發榮辱之主也言行君子之所以動天地也可不慎乎

和胡臥反靡音靡行下孟反見賢遍反○釋中

孚九二又義

同人先號咷而後笑子曰君子之道或出或處

或默或語二人同心其利斷金同心之言其臭如蘭

丁斷

管反臭昌又反○釋同人九五又義言君子之道初若不同而後實无間斷金如蘭言物莫能間而其言有味

也初六藉用白茅无咎子曰苟錯諸地而可矣藉之用

茅何咎之有慎之至也夫茅之為物薄而用可重也慎

斯術也以往其无所失矣

藉在夜反錯音措夫音扶。釋大過初六爻義

勞謙

君子有終吉子曰勞而不伐有功而不德厚之至也語

以其功下人者也德言盛禮言恭謙也者致恭以存其

位者也

釋謙九三爻義德言盛禮言恭言德欲其盛禮欲其恭也

亢龍有悔子曰貴

而无位高而无民賢人在下位而无輔是以動而有悔

也

釋乾上九爻義當屬文言此蓋重出

不出戶庭无咎子曰亂之所生也

則言語以為階君不密則失臣臣不密則失身幾事不

密則害成是以君子慎密而不出也

幾音機。釋子曰：節初九爻義。

子曰

作易者其知盜乎？易曰：負且乘，致寇至。負也者，小人之

事也；乘也者，君子之器也；小人而乘君子之器，盜思奪

之矣。上慢下暴，盜思伐之矣。慢藏誨盜，冶容誨淫。易曰：

負且乘，致寇至。盜之招也。

藏才浪反。○釋解六三爻義。

右第八章

此章言卦文之用。

天一地二天三地四天五地六天七地八天九地十

此簡

本在第十章之首。程子曰：宜在此。今從之。此言天地之數，陽奇陰耦，即所謂河圖者也。其位一六居下，二七居

上三八居左四九居右五十居中就此章而言之則中
五為衍母次十為衍子次一二三四為四象之位次六
七八九為四象之數二老位於西北二少天數五地數
位於東南其數則各以其類交錯於外也

五五位相得而各有合天數二十有五地數三十凡天

地之數五十有五此所以成變化而行鬼神也

此簡本在大衍

之後今按宜在此天數五者一三五七九皆奇也地數
五者二四六八十皆耦也相得謂一與二二與三三與四四與
六七與八九與十各以奇耦為類而自相得有合謂一
與六二與七三與八四與九五與十皆兩相合二十有五
五者五奇之積也三十者五耦之積也變化謂一變生
水而六化成之二化生火而七變成之三變生木而八
化成之四化生金而九變成之五變生土而十大衍之
化成之鬼神謂凡奇耦生成之屈伸往來者

數五十其用四十有九分而為二以象兩掛一以象三

揲之以四以象四時歸奇於扚以象閏五歲再閏故再

扚而後掛

揲時設反奇紀宜反扚郎得反。大衍之數五十蓋以河圖中宮天五乘地十而得之至

用以筮則又止用四十有九蓋皆出於理勢之自然而非人之知力所能損益也兩謂天地也掛懸其一於左

手小指之間也三三才也揲間而數之也奇所揲四數之餘也扚勒於左手手中三指之兩間也閏積月之餘日

而成月者也五歲之間再積日而再成月故五歲之中凡有再閏然後別起積分如一掛之後左右各一揲而

一扚故五者之中凡有乾之策二百一十有六坤之策再扚然後別起一掛也

百四十有四凡三百有六十當期之日

期音基。凡此策數生於四象

蓋河圖四面太陽居一而連九少陰居二而連八少陽居三而連七太陰居四而連六揲著之法則通計三變之餘去其初掛之一凡四為奇凡八為耦奇圓圖三耦方圖四三用其全四用其半積而數之則為六七八九而第三變揲數策數亦皆符會蓋餘三奇則九而其揲亦九策亦四九三十六是為居一之太陽餘二奇一耦則八而其揲亦八策亦四八三十二是為居二之少陰二耦一奇則七而其揲亦七策亦四七二十八是為居三之少陽三耦則六而其揲亦六策亦四六二十四是為居四之老陰是其變化往來進退離合之妙皆出自然非人之所能為也少陰退而未極乎虛少陽進而未極乎盈故此獨以老陽老陰計乾坤六爻之策數餘可推而知也期周一歲也凡三百六十五日

二篇之策萬

有一千五百二十當萬物之數也

二篇謂上下經凡陽爻百九十二得六千

九百一十二策陰爻百九十二是故四營而成易十有得四千六百八策合之得此數

八變而成卦

四營謂分二掛一揲四歸奇也易變易也謂一變也三變成爻十八變則成六爻也

八卦而小成

謂九變而成三畫得內卦也

引而伸之觸類而長之天

下之能事畢矣

長丁丈反。謂已成六爻而視其爻之變與不變以為動靜則一卦可變而為

六十四卦以定吉凶

凡四千九十六卦也顯道神德行是故可與酬酢可與

祐神矣

行下孟反。道因辭顯行以數神酬酢謂應對祐神謂助神化之功

子曰知變化

之道者其知神之所為乎

變化之道即上文數法是也皆非人之所能為故夫子歎

之而門人加子曰以別上文也

右第九章

此章言天地大衍之數揲著求卦之法然亦畧矣意其詳具於大卜筮人之官

而今不可考耳其可推者啓蒙備言之

易有聖人之道四焉以言者尚其辭以動者尚其變以制器者尚其象以卜筮者尚其占

四者皆變化之道是神之所為者也

以君子將有為也將有行也問焉而以言其受命也如嚮无有遠近幽深遂知來物非天下之至精其孰能與

於此

嚮許兩反古文響字與音預下同。此尚辭尚占之事言人以著問易求其卦爻之辭而以此之發言

處事則易受人之命而有以告之如嚮之應聲以決其未來之吉凶也以言與以言者尚其辭之以言義同命

則將筮而告蓍之語冠禮
筮日宰自右贊命是也

參伍以變錯綜其數通其變

遂成天地之文極其數遂定天下之象非天下之至變

其孰能與於此

參七南反錯七各反綜作弄反。此尚象之事變則象之未定者也參者三數

之也伍者五數之也既參以變又伍以變一先一後更相考覈以審其多寡之實也錯者交而互之一左一右

之謂也綜者總而挈之一低一昂之謂也此亦皆謂揲蓍求卦之事蓋通三揲兩手之策以成陰陽老少之畫

究七八九六之數以定卦爻動靜之象也參伍錯綜皆古語而參伍尤難曉按荀子云窺敵制變欲伍以參韓

非曰省同異之言以知朋黨之分偶參伍之驗以責陳言之實又曰參之以比物伍之以合參史記曰必參而

伍之又曰參伍不失漢書曰參伍易无思也无為也寂其賈以類相準此足以相發明矣

然不動感而遂通天下之故非天下之至神其孰能與

於此

此四者易之體所以立而用所以行者也易指著卦无思无為言其无心也寂然者感之體感通者

寂之用人心之妙其動靜亦如此

夫易聖人之所以極深而研幾也

幾音

機下同○研猶審也幾微也所以極深者至精也所以研幾者至變也

唯深也故能通天

下之志唯幾也故能成天下之務唯神也故不疾而速

不行而至

所以通志而成務者神之所為也

子曰易有聖人之道四焉

者此之謂也

右第十章

此章承上章之意言易之用有此四者

子曰夫易何為者也夫易開物成務冒天下之道如斯

而已者也是故聖人以通天下之志以定天下之業以

斷天下之疑

夫音扶冒莫報反斷丁亂反。開物成務謂使人卜筮以知吉凶而成事業冒天下

之道謂卦爻既設而天下之道皆在其中是故著之德圓而神卦之德方以

知六爻之義易以貢聖人以此洗心退藏於密吉凶與

民同患神以知來知以藏往其孰能與於此哉古之聰

明獻知神武而不殺者夫

方以知之知音智下知以獻知並同易音亦與音預夫音

扶。圓神謂變化无方方知謂事有定理易以貢謂變易以告人聖人體具三者之德而无一塵之累无事則

其心寂然人莫能窺有事則神知之用隨感而應所謂无卜筮而知吉凶也神武不殺得其理而不假其物之

謂是以明於天之道而察於民之故是興神物以前民

用聖人以此齋戒以神明其德夫

夫音扶。龜湛然純一之謂齋

肅然警惕之謂戒明天道故知神物之可興察民故故知其用之不可不有以開其先是以作為卜筮以教人而於此為齋戒以考其占使其心神明不測如鬼神之能知來也是故闔戶謂之坤闢

戶謂之乾一闔一闢謂之變往來不窮謂之通見乃謂

之象形乃謂之器制而用之謂之法利用出入民咸用

之謂之神

見賢遍反。闔闢動靜之機也先言坤者由靜而動也乾坤變通者化育之功也見象形

器者生物之序也法者聖人脩道之所為而神者百姓自然之日用也 是故易有大極是

生兩儀兩儀生四象四象生八卦

大音泰。一每生二自然之理也。易者陰

陽之變大極者其理也兩儀者始為一畫以分陰陽四象者次為二畫以分太少八卦者次為三畫而三才之象始備此數言者實聖人作易自然之次第有不假絲毫智力而成者畫卦探著其序皆然詳見序例啓蒙

八卦定吉凶吉凶生大業

有吉有凶是生大業

是故法象莫大乎

天地變通莫大乎四時縣象著明莫大乎日月崇高莫

大乎富貴備物致用立成器以為天下利莫大乎聖人

探賾索隱鈎深致遠以定天下之吉凶成天下之亹亹

者莫大乎蓍龜

縣音玄探吐南反索色白反疊亡偉反。富貴謂有天下履帝位立下疑有闕

文疊疊猶勉勉也。疑則急決故勉。

是故天生神物聖人則之天地變化

聖人效之天垂象見吉凶聖人象之河出圖洛出書聖

人則之

見賢遍反。此四者聖人作易之所由也。河圖洛書詳見啓蒙。

易有四象所以

示也繫辭焉所以告也定之以吉凶所以斷也

斷丁亂反。四

象謂陰陽老少示謂示人以所值之卦爻。

右第十一章

此章專言卜筮

易曰自天祐之吉无不利子曰祐者助也天之所助者

順也人之所助者信也履信思乎順又以尚賢也是以

自天祐之吉无不利也

釋大有上九爻義然在此无所屬或恐是錯簡宜在第八章之

未子曰書不盡言言不盡意然則聖人之意其不可見

乎子曰聖人立象以盡意設卦以盡情偽繫辭焉以盡

其言變而通之以盡利鼓之舞之以盡神

言之所傳者淺象之所示

者深觀奇耦二畫包含變化无有窮盡則可見矣變通

鼓舞以事而言兩子曰字疑衍其一蓋子曰字皆後人

所加故有此誤如近世通書乃周子所自作亦為乾坤

後人每章加以周子曰字其設問答處正如此也乾坤

其易之緼邪乾坤成列而易立乎其中矣乾坤毀則无

以見易易不可見則乾坤或幾乎息矣

緼與蘊同邪于遮反幾音機○

緼所包蓄者猶衣之著也易之所有陰陽而已凡陽皆乾凡陰皆坤畫卦定位則二者成列而易之體立矣乾

坤毀謂卦畫不立乾坤息謂變化不行

是故形而上者謂之道形而下者

謂之器化而裁之謂之變推而行之謂之通舉而措之

天下之民謂之事業

卦爻陰陽皆形而下者其理則道也因其自然之化而裁制之變之

義也變通二字上章以天言此章以人言

是故夫象聖人有以見天下之賾

而擬諸其形容象其物宜是故謂之象聖人有以見天

下之動而觀其會通以行其典禮繫辭焉以斷其吉凶



是故謂之爻

重出以起下文

極天下之賾者存乎卦鼓天下之

動者存乎辭

卦即象也辭即爻也

化而裁之存乎變推而行之存

乎通神而明之存乎其人默而成之不言而信存乎德

行

行下孟反。○卦爻所以變通者在人人之所以能神而明之者在德

右第十二章

繫辭下傳

八卦成列象在其中矣因而重之爻在其中矣

重直龍反。○成

列謂乾一兌二離三震四巽五坎六艮七坤八之類象謂卦之形體也因而重之謂各因一卦而以八卦次第

加之為六十四也又六爻也剛柔相推變在其中矣繫辭也既重而後卦有六爻也

為而命之動在其中矣

剛柔相推而卦爻之變往來交錯无不可見聖人因其如此而

皆繫之辭以命其吉凶則占者所值當動之爻象亦不出乎此矣

吉凶悔吝者生乎動

者也

吉凶悔吝皆辭之所命也然必因卦爻之動而後見

剛柔者立本者也變通

者趣時者也

趣七樹反。一剛一柔各有定位自此而彼變以從時

吉凶者貞勝

者也

貞正也常也物以其所正為常者也天下之事非吉則凶非凶則吉常相勝而不已也

天地

之道貞觀者也日月之道貞明者也天下之動貞夫一

者也

觀官換反夫音扶。觀示也天下之動其變无窮然順理則吉逆理則凶則其所正而常者亦一理

而已夫乾確然示人易矣夫坤隤然示人簡矣確苦角反易音

異隤音頽。確然健貌隤然順貌所謂貞觀者也。爻也者效此者也象也者像

此者也。此謂上文乾坤所示之理爻之爻象動乎內吉

凶見乎外功業見乎變聖人之情見乎辭。內謂著卦之中外謂著卦

之外變即動乎內之辭。天地之大德曰生聖人之大寶曰

位何以守位曰仁何以聚人曰財理財正辭禁民為非

曰義。曰人之人今本作仁呂氏從古蓋所謂非衆罔與守邦

右第一章
此章言卦爻吉凶造化功業

古者包犧氏之王天下也仰則觀象於天俯則觀法於

地觀鳥獸之文與地之宜近取諸身遠取諸物於是始

作八卦以通神明之德以類萬物之情

包蒲交反王于況反。王昭素

曰與地之間諸本多有天字俯仰遠近所取不一然不
過以驗陰陽消息兩端而已神明之德如健順動止之

性萬物之情如作結繩而為罔罟以佃以漁蓋取諸離
雷風山澤之象

罔與網同罟音古佃音田
○兩目相承而物麗焉

包犧氏沒神農氏作斲木為

耜揉木為耒耒耨之利以教天下蓋取諸益

斲涉角反
耜音似耒

力對反耨奴豆反。二體皆木
上入下動天下之益莫大於此

日中為市致天下之民

聚天下之貨交易而退各得其所蓋取諸噬嗑

日中為市上明

而下動又借噬為市嗑為合也

神農氏沒黃帝堯舜氏作通其變使民

不倦神而化之使民宜之易窮則變變則通通則久是

以自天祐之吉无不利黃帝堯舜垂衣裳而天下治蓋

取諸乾坤

乾坤變化而无為

剡木為舟剡木為楫舟楫之利以

濟不通致遠以利天下蓋取諸渙

剡口姑反剡以冉反木在水上也致遠

以利天下疑衍

服牛乘馬引重致遠以利天下蓋取諸隨

下動上說

重門擊柝以待暴客蓋取諸豫

重直龍反柝他各反。豫備之意

斷木

為杵掘地為臼臼杵之利萬民以濟蓋取諸小過

斷丁緩反

杵昌呂反掘其月反。下止上動

弦木為弧剡木為矢弧矢之利以威

天下蓋取諸睽

睽乖然後威以服之

上古穴居而野處後世聖人

易之以宮室上棟下宇以待風雨蓋取諸大壯

處上聲壯固

之意古之葬者厚衣之以薪葬之中野不封不樹喪期无

數後世聖人易之以棺槨蓋取諸大過

衣去聲。送死大事而過於厚

上古結繩而治後世聖人易之以書契百官以治萬民

以察蓋取諸夬

明決之意

右第二章

此章言聖人制器尚象之事

是故易者象也象也者像也

易卦之形理之似也

象者材也

象言一卦

之爻也者效天下之動者也

效放也

是故吉凶生而悔吝

著也

悔吝本微因此而著

右第三章

陽卦多陰陰卦多陽

震坎艮為陽卦皆一陽二陰巽離兌為陰卦皆一陰二陽

其故

何也陽卦奇陰卦耦

奇紀宜反。凡陽卦皆五畫凡陰卦皆四畫

其德行何

也陽一君而二民君子之道也陰二君而一民小人之

道也

行下孟反。君謂陽民謂陰

右第四章

易曰憧憧往來朋從爾思子曰天下何思何慮天下同

歸而殊塗一致而百慮天下何思何慮

此引咸九四爻辭而釋之言理

本无二而殊塗百慮莫非自然何以思慮為哉必思而從則所從者亦狹矣

曰往則月來月

往則日來日月相推而明生焉寒往則暑來暑往則寒

來寒暑相推而歲成焉往者屈也來者信也屈信相感

而利生焉

信音申。言往來屈信皆感應自然之常理如憧憧焉則入於私矣所以必思而後有從

也尺蠖之屈以求信也龍蛇之蟄以存身也精義入神

以致用也利用安身以崇德也

蠖紆縛反蟄真立反。因言屈信往來之理而

又推以言學亦有自然之機也精研其義至於入神屈

之至也然乃所以為出而致用之本利其施用无適不
安信之極也然乃所以為入而崇過此以往未之或知

德之資内外交相養互相發也

下學之事盡力於精義利用而交養互發之機自不能已自是

也窮神知化德之盛也
以上則亦无所用其力矣至於窮神知化乃德盛仁熟而自致耳然不知者往而屈也自致者來而信也是亦感應自然之理而已張子曰氣有陰陽推行有漸為易

化合一不測為神此上四節皆以釋咸九四爻義
曰困于石據于蒺藜入于其宮不見其妻凶子曰非所

困而困爲名必辱非所據而據爲身必危既辱且危死

期將至妻其可得見邪

釋困六三爻義

易曰公用射隼于高墉

之上獲之无不利子曰隼者禽也弓矢者器也射之者

人也君子藏器於身待時而動何不利之有動而不括

是以出而有獲語成器而動者也

射石亦反隼恤允反括古活反。括結礙

也此釋解上六爻義

子曰小人不恥不仁不畏不義不見利不勸

不威不懲小懲而大誡此小人之福也易曰履校滅趾

无咎此之謂也

校音教。此釋噬嗑初九爻義

善不積不足以成名惡

不積不足以滅身。小人以小善為无益而弗為也，以小惡為无傷而弗去也。故惡積而不可掩，罪大而不可解。易曰：何校？滅耳。凶。

何河可反，去羌吕反。此釋噬嗑上九文義。

子曰：危者安

其位者也，亡者保其存者也，亂者有其治者也。是故君子安而不忘危，存而不忘亡，治而不忘亂，是以身安而國家可保也。易曰：其亡其亡，繫于苞桑。

此釋否九五文義。

子曰：

德薄而位尊，知小而謀大，力小而任重，鮮不及矣。易曰：鼎折足，覆公餗，其形渥，凶。言不勝其任也。

知音智鮮仙善反折之設。

反餽音速渥烏角反勝音升。此釋鼎九四爻義。

子曰知幾其神乎君子上交

不諂下交不瀆其知幾乎幾者動之微吉之先見者也

君子見幾而作不俟終日易曰介于石不終日貞吉介

如石焉寧用終日斷可識矣君子知微知彰知柔知剛

萬夫之望。

幾音機先見之見音現斷丁玩反望無方反此釋豫六二爻義漢書吉之之間有凶字

子曰顏氏之子其殆庶幾乎有不善未嘗不知知之未

嘗復行也易曰不遠復无祇悔元吉

幾音機復行之復芳服反祇音其○

殆危也庶幾近意言近道也此釋復初九爻義

天地絪縕萬物化醇男女構精

萬物化生易曰三人行則損一人一人行則得其友言

致一也

綱音因緼紆云反。綱緼交密之狀醇謂厚而凝也言氣化者也化生形化者也此釋損六三

義

子曰君子安其身而後動易其心而後語定其交而

後求君子脩此三者故全也危以動則民不與也懼以

語則民不應也无交而求則民不與也莫之與則傷之

者矣易曰莫益之或擊之立心勿恒凶

易其之易去聲此釋益上九

義

右第五章

子曰乾坤其易之門邪乾陽物也坤陰物也陰陽合德

而剛柔有體以體天地之撰以通神明之德

邪于遮反撰仕免反

。諸卦剛柔之體皆以乾坤合德而成故曰乾坤易之門撰猶事也其稱名也雜而不越

於稽其類其衰世之意邪

萬物雖多无不出於陰陽之變故卦爻之義雖雜出而不

差繆然非上古淳質之時思慮所及也故以為衰世之意蓋指文王與紂之時也

夫易彰往而

察來而微顯闡幽開而當名辨物正言斷辭則備矣

夫音

扶當去聲斷丁玩反。而微顯恐當作微顯而開而之而亦疑有誤其稱名也小其取類

也大其旨遠其辭文其言曲而中其事肆而隱因貳以

濟民行以明失得之報

中丁仲反行下孟反
○肆陳也貳疑也

右第六章

此章多闕文疑字不可盡通後皆放此

易之興也其於中古乎作易者其有憂患乎

夏商之末
易道中微

文王拘於羑里而
繫彖辭易道復興

是故履德之基也謙德之柄也復德

之本也恒德之固也損德之脩也益德之裕也困德之

辨也井德之地也巽德之制也

履禮也上天下澤定分
不易必謹乎此然後其

德有以為基而立也謙者自卑而尊人又為禮者之所
當執持而不可失者也九卦皆反身脩德以處憂患之
事也而有為基所以立柄所以持復者心不外而善
端存恒者守不變而常且久懲忿窒慾以脩身遷善改

過以長善困以自驗其力井以不變履和而至謙尊而其所然後能巽順於理以制事變也

光復小而辨於物恒雜而不厭損先難而後易益長裕

而不設困窮而通井居其所而遷巽稱而隱

易以鼓反長丁丈反

稱尺證反。此如書之九德禮非強世然事皆至極謙以自卑而尊且光復陽微而不亂於羣陰恒處雜而常

德不厭損欲先難習熟則易益但充長而不造作困身困而道亨井不動而及物巽稱物之宜而潛隱不露

履以和行謙以制禮復以自知恒以一德損以遠害益

以興利困以寡怨井以辨義巽以行權

和行之行下孟反遠袁萬反。

寡怨謂少所怨尤辨義謂安而能慮

右第七章

此章三陳九卦以明處憂患之道

易之為書也不可遠為道也屢遷變動不居周流六虛

上下無常剛柔相易不可為典要唯變所適

遠表萬反上上聲下

去聲。遠猶忘也周流六虛謂陰陽流行於卦之六位

其出入以度外內使知懼

此句未詳疑有脫誤

又明於憂患與故无有師保如臨父母

雖无師保

而常若父母臨之戒懼之至

初率其辭而揆其方既有典常苟非其

人道不虛行

揆葵癸反。方道也始由辭以度其理則見其有典常矣然神而明之則存乎其人

也

右第八章

易之為書也原始要終以為質也六爻相雜唯其時物

也要一遙反下同。質謂卦體卦必舉其其初難知其

上易知本末也初辭擬之卒成之終易去聲。此言初上二爻若夫

雜物撰德辨是與非則非其中爻不備夫音扶。此謂卦中四爻噫

亦要存亡吉凶則居可知矣知者觀其彖辭則思過半

矣知者之知音智。彖統論一卦六爻之體二與四同功而異位其善不同

二多譽四多懼近也柔之為道不利遠者其要无咎其

用柔中也

要如字又一遙反下章同。此以下論中爻同功謂皆陰位異位謂遠近不同四近居故

多懼柔不利遠而二多譽者以其柔中也

三與五同功而異位三多凶五多

功貴賤之等也其柔危其剛勝邪

勝音升。三五同陽位而貴賤不同然以

柔居之則危唯剛則能勝之

右第九章

易之為書也廣大悉備有天道焉有人道焉有地道焉

兼三才而兩之故六六者非它也三才之道也

三畫已具三才

重之故六而以上二爻為天中二爻為人下二爻為地

道有變動故曰爻爻有等

故曰物物相雜故曰文文不當故吉凶生焉

當去聲。道有變動。

謂卦之一體等謂遠近貴賤之差相雜謂剛柔之位相間不當謂爻不當位

右第十章

易之興也其當殷之末世周之盛德邪當文王與紂之事邪是故其辭危危者使平易者使傾其道甚大百物不廢懼以終始其要无咎此之謂易之道也

邪于遮反易者之易

去聲要平聲。危懼故得平安慢易則必傾覆易之道也

右第十一章

夫乾天下之至健也德行恒易以知險夫坤天下之至

順也德行恒簡以知阻

夫音扶行易並去聲阻莊呂反至健則所行无難故易至順

則所行不煩故簡然其於事皆有以知其難而不敢易以處之也是以其有憂患則健者如自高臨下而知其險順者如自下趨上而知其阻蓋雖易而能知險則不陷於險矣既簡而又知阻則不困於阻矣所以能危能懼而无易能說諸心能研諸侯之慮定天下之吉凶成者之傾也能說諸心能研諸侯之慮定天下之吉凶成

天下之亹亹者

說音悅。侯之二字衍說諸心者心與理會乾之事也研諸慮者理因慮審坤

之事也說諸心故有以定吉凶研諸慮故有以成亹亹

是故變化云為吉事有祥

象事知器占事知來

變化云為故象事可以知來吉事有祥故占事可以知來天地

設位聖人成能人謀鬼謀百姓與能

與音預。天地設位而聖人作易以

成其功於是人謀鬼謀雖百姓之愚皆得以與其能

八卦以象告爻彖以情言剛

柔雜居而吉凶可見矣

象謂卦畫爻象謂卦爻辭

變動以利言吉凶

以情遷是故愛惡相攻而吉凶生遠近相取而悔吝生情

偽相感而利害生凡易之情近而不相得則凶或害之

悔且吝

惡鳥路反。不相得謂相惡也凶害悔吝皆由此生

將叛者其辭慙中心

疑者其辭枝吉人之辭寡躁人之辭多誣善之人其辭

游失其守者其辭屈

卦爻之辭亦猶是也

右第十二章

周易本義卷三

欽定四庫全書薈要卷一百九十七

經部

周易本義卷四

宋 朱子 撰

說卦傳

昔者聖人之作易也幽贊於神明而生蓍

幽贊神明猶言贊化育龜

筮傳曰天下和平王道得而蓍莖長丈其叢生滿百莖

參天兩地而倚數

參七南反○天

圓地方圓者一而圓三三各一奇故參天而為三方者一而圓四四合二耦故兩地而為二數皆倚此而起故揲蓍三變之末其餘三奇則三三而九三耦則三二而六兩二一三則為七兩三一二則為八觀變於

陰陽而立卦發揮於剛柔而生爻和順於道德而理於

義窮理盡性以至於命

和順從容无所乖逆統言之也
理謂隨事得其條理析言之也

窮天下之理盡人物之性而合於天道此聖人作易之極功也

右第一章

昔者聖人之作易也將以順性命之理是以立天之道

曰陰與陽立地之道曰柔與剛立人之道曰仁與義兼

三才而兩之故易六畫而成卦分陰分陽迭用柔剛故

易六位而成章

兼三才而兩之總言六畫又細分之則陰陽之位間雜而成文章也

右第二章

天地定位山澤通氣雷風相薄水火不相射八卦相錯

薄音博。邵子曰：此伏羲八卦之位。乾南坤北，離東坎西，兌居東南，震居東北，巽居西南，艮居西北。於是八卦

相交而成六十四卦。所謂先天之學也。數往者順，知來者逆，是故易逆數

也。數並上聲。起震而歷離兌，以至於乾，數已生之卦也。自巽而歷坎艮，以至於坤，推未生之卦也。易之生

卦則以乾兌離震巽坎艮坤為次，故皆逆數也。

右第三章

雷以動之，風以散之，雨以潤之，日以烜之，艮以止之，兌

以說之，乾以君之，坤以藏之。

烜與暄同，說音悅。○此卦位相對與上章同。

右第四章

帝出乎震齊乎巽相見乎離致役乎坤說言乎兌戰乎

乾勞乎坎成言乎艮

說音悅下同。帝者天之主宰邵子曰此卦位乃文王所定所謂後

天之學也萬物出乎震震東方也齊乎巽巽東南也齊也者

言萬物之潔齊也離也者明也萬物皆相見南方之卦

也聖人南面而聽天下嚮明而治蓋取諸此也坤也者

地也萬物皆致養焉故曰致役乎坤兌正秋也萬物之

所說也故曰說言乎兌戰乎乾乾西北之卦也言陰陽

相薄也坎者水也正北方之卦也勞卦也萬物之所歸也故曰勞乎坎艮東北之卦也萬物之所成終而所成始也故曰成言乎艮

嚮讀作向說音悅下同薄音博。上言帝此言萬物之隨帝以出入

也

右第五章

此章所推卦位之說多未詳者

神也者妙萬物而為言者也動萬物者莫疾乎雷撓萬物者莫疾乎風燥萬物者莫熯乎火說萬物者莫說乎澤潤萬物者莫潤乎水終萬物始萬物者莫盛乎艮故

水火相逮雷風不相悖山澤通氣然後能變化既成萬

物也

撓乃飽反燠呼但反悖必內反○此去乾坤而專言六子以見神之所為然其位序亦用上章之說

未詳其義

右第六章

乾健也坤順也震動也巽入也坎陷也離麗也艮止也

兌說也

說音悅○此言八卦之性情

右第七章

乾為馬坤為牛震為龍巽為雞坎為豕離為雉艮為狗

兌為羊

遠取諸物如此

右第八章

乾為首坤為腹震為足巽為股坎為耳離為目艮為手

兌為口

近取諸身如此

右第九章

乾天也故稱乎父坤地也故稱乎母震一索而得男故謂之長男巽一索而得女故謂之長女坎再索而得男故謂之中男離再索而得女故謂之中女艮三索而得

男故謂之少男兌三索而得女故謂之少女

索色白反長之丈反

少詩照反下章同○索求也謂揲著以求爻也男女指卦中一陰一陽之爻而言

右第十章

乾為天為園為君為父為玉為金為寒為冰為大赤為

良馬為老馬為瘠馬為馵馬為木果

園音圓馵邦角反○荀九家此下有

為龍為直為衣為言坤為地為母為布為釜為吝嗇為均為子母

牛為大輿為文為衆為柄其於地也為黑

釜房甫反嗇音色○荀九

家有為牝為迷為方為囊為囊為黃為帛為漿震為雷為龍為玄黃為專為大

塗為長子為決躁為蒼筤竹為萑葦其於馬也為善鳴

為鼻足為作足為的顙其於稼也為反生其究為健為

蕃鮮

粵音孚簋音郎萑音丸鼻主樹反蕃音煩○荀九家有為玉為鵠為鼓

巽為木為風

為長女為繩直為工為白為長為高為進退為不果為

臭其於人也為寡髮為廣顙為多白眼為近利市三倍

其究為躁卦

下為長之長如字○荀九家有為楊為鸛

坎為水為溝瀆為隱

伏為矯輮為弓輪其於人也為加憂為心病為耳痛為

血卦為赤其於馬也為美脊為亟心為下首為薄蹄為

曳其於輿也為多眚為通為月為盜其於木也為堅多

心縣如九反亟紀力反曳以制反○荀九家有為離為

宮為律為可為棟為叢棘為狐為蒺藜為桎梏

火為日為電為中女為甲冑為戈兵其於人也為大腹

為乾卦為鼃為蟹為贏為蚌為龜其於木也為科上槁

乾音干蟹戶買反贏力禾反蚌步項反○荀九家有為牝牛艮為山為徑路為小石

為門闕為果蓏為閤寺為指為狗為鼠為黔喙之屬其

於木也為堅多節

蓏力果反黔其堅反喙況廢反又兌

為澤為少女為巫為口舌為毀折為附決其於地也為

剛鹵為妾為羊

折之列反鹵力杜反○荀九家有為常為輔頰

右第十一章

此章廣八卦之象其間多不可曉者求之於經亦不盡合也

序卦傳

有天地然後萬物生焉盈天地之間者唯萬物故受之以屯屯者盈也屯者物之始生也物生必蒙故受之以蒙蒙者蒙也物之穉也物穉不可不養也故受之以需需者飲食之道也飲食必有訟故受之以訟訟必有衆起故受之以師師者衆也衆必有所比故受之以比比

者比也比必有所畜故受之以小畜物畜然後有禮故

受之以履履而泰然後安故受之以泰

晁氏曰鄭本无而泰二字

泰

者通也物不可以終通故受之以否物不可以終否故
受之以同人與人同者物必歸焉故受之以大有有大
者不可以盈故受之以謙有大而能謙必豫故受之以
豫豫必有隨故受之以隨以喜隨人者必有事故受之
以蠱蠱者事也有事而後可大故受之以臨臨者大也
物大然後可觀故受之以觀可觀而後有所合故受之

以噬嗑嗑者合也物不可以苟合而已故受之以賁賁者飾也致飾然後亨則盡矣故受之以剝剝者剝也物不可以終盡剝窮上反下故受之以復復則不妄矣故受之以无妄有无妄然後可畜故受之以大畜物畜然後可養故受之以頤頤者養也不養則不可動故受之以大過物不可以終過故受之以坎坎者陷也陷必有所麗故受之以離離者麗也

右上篇

有天地然後有萬物有萬物然後有男女有男女然後有夫婦有夫婦然後有父子有父子然後有君臣有君臣然後有上下有上下然後禮義有所錯夫婦之道不可以不久也故受之以恒恒者久也物不可以久居其所故受之以遯遯者退也物不可以終遯故受之以大壯物不可以終壯故受之以晉晉者進也進必有所傷故受之以明夷夷者傷也傷於外者必反其家故受之以家人家道窮必乖故受之以睽睽者乖也乖必有難

故受之以蹇蹇者難也物不可以終難故受之以解解者緩也緩必有所失故受之以損損而不已必益故受之以益益而不已必決故受之以夬夬者決也決必有相遇故受之以姤姤者遇也物相遇而後聚故受之以萃萃者聚也聚而上者謂之升故受之以升升而不已必困故受之以困困乎上者必反下故受之以井井道不可不革故受之以革革物者莫若鼎故受之以鼎主器者莫若長子故受之以震震者動也物不可以終動

止之故受之以艮艮者止也物不可以終止故受之以
漸漸者進也進必有所歸故受之以歸妹得其所歸者
必大故受之以豐豐者大也窮大者必失其居故受之
以旅旅而無所容故受之以巽巽者入也入而後說之
故受之以兌兌者說也說而後散之故受之以渙渙者
離也物不可以終離故受之以節節而信之故受之以
中孚有其信者必行之故受之以小過有過物者必濟
故受之以既濟物不可窮也故受之以未濟終焉

右下篇

雜卦傳

乾剛坤柔比樂師憂

樂音洛

臨觀之義或與或求

以我臨物曰與

物來觀我曰求或曰二卦互有與求之義

屯見而不失其居蒙雜而著

見賢遍反

著陟慮反○屯震遇坎震動故見坎險不行也蒙坎遇艮坎幽昧艮光明也或曰屯以初言蒙以二言

震

起也艮止也損益盛衰之始也○大畜時也无妄災也

止健者時有適然无妄而災自外至

萃聚而升不來也謙輕而豫怠也○

噬嗑食也賁无色也

白受采

兌見而巽伏也

見賢遍反○兌陰外見巽

陰內隨无故也蠱則飭也

飭與勅同。隨前无故蠱後當飭。

剝爛也復

反也。○晉晝也明夷誅也

誅傷也。

井通而困相遇也

剛柔相遇。

而剛見

咸速也恒久也

咸速恒久。

渙離也節止也解緩也蹇

難也睽外也家人內也否泰反其類也

難乃旦反。

大壯則止

遯則退也

止謂不退。

大有衆也同人親也革去故也鼎取新

也小過過也中孚信也豐多故也親寡旅也

去起呂反。既明且。

動其故

離上而坎下也

上時掌反下遯嫁反。火炎上水潤下。

小畜寡也

履不處也

處上聲。不處行進之義。

需不進也訟不親也大過顛也

姤遇也柔遇剛也漸女歸待男行也頤養正也既濟定也歸妹女之終也未濟男之窮也夬決也剛決柔也君子道長小人道憂也

長丁丈反○自大過以下卦不反對或疑其錯簡今以韻協之又似

非誤未詳何義

周易本義卷四

謹案卷二第二頁後四行處咸之極宋本咸作感
第五頁前六行有所好而能絕之以遯之象也宋
本所作情

第六頁後五行故其象如此而占亦與咸九五同
宋本象下有占字無而占以下八字

第十八頁後五六行謂一變則爲純乾也宋本則
作即無也字

第十九頁前四行九三當決之時宋本決作夬

第十九頁後五行傳曰以下宋本所無

第二十二頁後二行亦可小蓋矣宋本可小作小

可

第二十四頁後七行據于蒺藜宋本藜作藜注同

第二十五頁前五行上下旣傷宋本無上字

第二十五頁前七行又利用祭祀宋本無用字

第二十六頁前七行而禽鳥亦莫之顧也宋本也

作矣

第三十八頁前六行不可須臾離也上宋本有而字

第三十八頁後一行慎刑如山宋本慎避諱作謹
第四十一頁後一行而反來就二陽以求說宋本
求下有其字

第四十五頁前五行以居說極宋本以作亦

第四十七頁前三行若以六二爻例宋本以作依

據下文例之當是

卷三第二頁後二行右第一章四大字宋本所無
注內此章二字作此第一章二章以下並倣此
不複簽

第四頁前八行神之伸也宋本伸作申

第五頁後四行大而无外久而无窮宋本並無而
字

第十頁後二行變易也宋本無易字

第十一頁後七行參之以此物刊本比訛此據宋

本改

第十三頁前三行聖人以此齋戒宋本齋作齊

第十九頁前四行此引咸九四爻辭而釋之宋本

無此

卷四第六頁後八行物大然後可觀宋本可下有

以字

第七頁後七行必反其家宋本其作于

第九頁後三行咸速恒久宋本作感速常久蓋以

感釋咸以常釋恒於義爲當後人訛以常爲避
恒字之諱而改因並改感字以就之似非

去人 佛
陀教育基金會 釋淨空 敬贈

